



Ang Plano Sa Dios

R. B. THIEME, JR.

(Visayan Version)



“Kay maingon nga ang mga langit hataas kay sa yuta, mao man ang Akong mga pamaagi labi pa ka hataas kay sa inyong mga pamaagi, ug ang Akong mga panghunahuna kay sa inyong mga panghunahuna. Kay maingon nga ang ulan ug ang nieve managpanulo gikan sa langit, ug dili mobalik didto kon walay pagbubo sa yuta, ug maghimo niini nga mamunga ug moturok, ug maghatag og binhi sa magpupugas ug tinapay sa kumakaon; sa ingon niini mao man ang Akong pulong nga magagula gikan sa Akong baba; kini dili mobalik Kanako nga walay kapuslanan, kondili nga kini magatuman sa Akong kagustohan, ug sa pagkamalampuson sa katuyoan nga tungod niana kini Akong gipadala.”

Isaias 55:9-11

ANG PLANO SA DIOS

R. B. THIEME, JR.



**R. B. THIEME, JR., BIBLE MINISTRIES
HOUSTON, TEXAS**

PALISIYA SA PINANSIYAL

Wala gayuy bayad sa tanang materyales nga gikan sa R. B. Thieme, Jr., Bible Ministries. Sa tanang mahiligon sa pagkat-on sa Bibliya, makaangkon sa among DVDs, MP3 CDs, ug mga mantalaan nga walay bayad. Ang Dios mao ang naghatag sa doktrina sa Bibliya. Tinguha namo nga mapakita ang Iyang grasya.

R. B. Thieme, Jr., Bible Ministries usa ka ministeryo sa grasya ug kinatibukang gipadagan sa boluntaryong kontribusyon. Walay listahan sa presyo sa tanang materyales. Walay salapi nga gipangayo. Kon ang pagkamapasalamat sa pulong sa Dios maoy naghatag og kagana sa usa ka magtotoo nga mohatag ug kontribusyon, aduna siyay katungod sa paghatag ug kontribusyon para sa pag-apod-apod sa pulong sa Dios.

Kini nga basahon napatik gikan sa mga pagtulon-an ug mga wala maimprinta nga mga sinulat ni R. B. Thieme, Jr.

Usa ka listahan sa magamit nga mga audio ug mga publikasyon ang ihatag human sa inyong paghangyo.

R. B. Thieme, Jr., Bible Ministries
P.O. Box 460829, Houston, Texas 77056-8829
www.rbthieme.org

© 1972, 1973, 1992, 2003 by R. B. Thieme, Jr. Iya lamang ang tanang mga katungod niining basahona.

Unang Edisyon gimantala niadtong 1972. Ika-upat nga edisyon gimantala niadtong 2003.

Unang Edisyon sa Binisayang paghubad niadtong 2013. Ikaduhang Edisyon sa Binisayang paghubad niadtong 2014.

Walay kabahin niining publikasyon nga ipasanay o ipadala sa lainlaing porma o paagi, elektroniko o mekanikal, lakip na ang seroks, rekord, ug uban pang mga pamaagi sa pagkopya, nga walay nakasulat nga pagtugot gikan sa tigmantala.

Hinubad ngadto sa Binisaya nga pinulongan ni Amado D. Carejo, Jerome L. Salutan, Perkin Galdican ug ni Henry Magto.

Gireview nila Jerome L. Salutan, Amado D. Carejo, Elina C. Vicoy ug Raflyn H. Salutan.

Pinatik nga may pagtugot sa R. B. Thieme, Jr., Bible Ministries.

Napatik sa Tagbilaran City, Bohol, Philippines.

Mga Sulud

Pasiuna v

Unom ka mga Sugyot 1

Unang Sugyot: Ang Pagkaadunay Dios 2

Ikaduhang Sugyot: Ang Dios Nagpadayag sa Iyang
Kaugalingon 3

Ikatulong Sugyot: Ang Dios Atong Masabtan 3

Ikaupat nga Sugyot: Ang Dios Adunay Usa ka Plano . . 4

Ikalimang Sugyot: Ikaw ang Tumong sa Plano sa Dios . 4

Ikaunom nga Sugyot: Ikaw Adunay Kaakuhan sa
Pagpatalinghug sa Dios 4

Bahin Uno: Kaluwasan 7

Ang Esensiya sa Tawo 8

 Kinaugalingong-Pagkahibalo 9

 Mentalidad 9

 Kabubut-on 9

 Tanlag (Sumbanan ug Sukdanan) 10

Ang Kinaiyang Makasasala 10

Produksiyon sa Kinaiyang Makasasala 12

 Lugar sa Kahuyang 12

 Mga Sala sa Panghunahuna 13

 Mga Sala sa Dila 13

 Mga Sala sa Buhat 14

 Lugar sa Kalig-on 16

Mga Hilig sa Kinaiyang Makasasala	19
Pangibog sa Kinaiyang Makasasala	20
Bahin Dos: Ang Magtotoo nga Anaa sa Panahon	22
Usa ka Butang nga Daan, Usa ka Butang nga Bag-o .	23
Pagbakwi Gikan sa Aberiya	26
Ang Karnal nga mga Taga-Corinto	29
Rebound, Ang Yawe sa Pagtuman sa Plano sa Dios . .	35
Grasya mao ang Plano sa Dios	38
Bahin Tres: Ang Magtotoo sa Eternidad	40
Human sa Kaluwasan, Unsa?	42
 Pakapin sa Basahon.	 45
Timan-anan sa Balaang Kasulatan	52

Pasiuna

Sa dili pa ikaw magsugod sa pagtoon sa Bibliya, kon ikaw usa ka magtotoo diha kang Ginoong Jesu-Kristo, siguroha nga imo nang gipanghinganlan ang imong mga sala sa pribadong paagi ngadto sa Dios nga Amahan.

Kung isugid ta ang atong [nahibaloan] mga sala, Siya matinumanon ug matarong aron sa pagpasaylo sa atong [nahibaloan] mga sala ug sa paghinlo kanato gikan sa tanang [wala-nahibalo-i, o nahikalimtan na nga mga sala] dili-pagkamatarong. (1 Juan 1:9)

Ikaw anaa na dayon sa pakigfellowship diha sa Dios, napuno diha sa Balaang Espiritu, ug andam na aron sa pagkat-on sa doktrina sa Bibliya nga gikan sa Pulong sa Dios.

“Ang Dios espiritu, ug kinsa kadtong magasimba Kaniya kinahanglan magasimba diha sa [ang pagpuno sa] espiritu ug [Biblikal] kamatuuran.”
(Juan 4:24)

Kon ikaw wala pa sa kinaugalingon nga mitoo diha ni Ginoong Jesu-Kristo isip imong Manluluwas, ang isyu dili ang pagsugid sa imong mga sala. Ang isyu mao ang

bugtong pagtoo kang Jesu-Kristo lamang.

“Siya nga motoo sa Anak may kinabuhi nga walay katapusan; apan siya nga dili mosunod [ang sugo sa pagtoo] sa Anak dili makakita sa kinabuhi, hinoon magapabilin ang kaligutgut sa Dios diha kaniya.” (Juan 3:36)

ANG PULONG SA DIOS buhi ug labing gamhanan, mas hait pa kay sa bisan unsang duhay-sulab nga espada, ug motusok bisan pa ngadto sa nagpahimulag sa kalag ug sa espiritu, ug sa mga lutahan ug sa kauyokan, maoy usa ka kritiko sa mga panghunahuna ug mga pagtinguha sa kasingkasing. (Mga Hebreohanon 4:12)

Ang tibuuk nga Kasulatan sa Dios-gipaginhawa, ug maginansyahon alang sa doktrina, alang sa pagbadlong, alang sa koreksiyon, alang sa panudlo ngadto sa pagkamatarong; aron ang tawo sa Dios basin ra mahimong hamtong, sa hingpit gisangkapan ngadto sa tanang maayong mga buhat. (2 Timoteo 3:16-17)

Pagtoon aron pagpakita sa imong kaugalingon nga aprobado ngadto sa Dios, usa ka magbubuhay nga dili kinahanglang maulaw, sa insakto nga nagbahinbahin sa pulong sa kamatuuran. (2 Timoteo 2:15)

UNOM KA MGA SUGYOT

MAO KINI ANG SINUGDANAN sa nahaunang kurso sa pagtoon. Ang atong basahon mao ang Bibliya. Ang Dios wala magpadayag sa Iyang plano kanato karong panahona pinaagi sa mga panan-awon, mga tingog, mga damgo, o sa bisan unsa nga paagi sa paghatag og direktang pagpadayag sama sa Iyang gibuhad ngadto sa mga propeta sa Karaang Kasulatan ug sa mga apostoles sa Bag-ong Kasulatan. Ang Kasulatan mao ang bugtong gigikanan sa mga kasayuran mahitungod sa Plano sa Dios. Ang tanang mga kamatuuran o doktrina nga gipadayag sa Dios makaplagan diha sa Bibliya.

Busa, sinatia ang imong kaugalingon sa mga Balaang Kasulatan pinaagi sa paggamit sa Mga Hebreohanon 4:12 ingon nga usa ka ehemplo. Sayon ra kini nga buhaton tungod kay ang Karaan ug Bag-ong Kasulatan nabahin man ingon nga mga “kalye ug mga balay.” Mga Hebreohanon mao ang kalye; ang numero sa balay ang 4:12—kapitulo 4, bersikulo 12. Ang Mga Hebreohanon makita nato sa Bag-ong Kasulatan. Kung gikinahanglan, tan-awa ang nahimutangan sa mga kalye sa

timan-anan. Ayaw ikaulaw ang imong pagbuhat niini.

Karon sa dili pa kita magsugod sa atong pagtoon kinahanglan nga ato unang susihon ang unom ka mga pasiunang sugyot mahitungod sa Dios. Kita wala maningkamot sa pagpamatuud niini, kondili pagpahayag lamang niini. Kining mga sugyot mao ang gikinahanglan natong susihon aron sa pagkab-ot sa tukmang pagsabot mahitungod sa plano sa Dios.

Unang Sugyot: Ang Pagkaadunay Dios

Ang pag-asumir nga adunay Dios mao ang patukuranan niini nga pagtoon. Naghunahuna man *ikaw* o wala nga adunay Dios dili kini mao ang gihatagan og pagtagad sa pagkakaron. Ang hatagan nimo sa pagtagad mao ang pagpadayon sa pagbaton ug makatarunganon ug tin-aw nga panghunahuna. Kung ikaw moingon, “Walay Dios,” nahimo ikaw nga dili makatarunganon ug wala sa saktong panghunahuna (Mga Salmo 14:1; 53:1-2). Ang makatarunganong pahayag mao unta kini, “Pinasikad sa paggamit sa pangatarungan o sa unsay makita sa atong mga mata wala gayuy Dios.” Apan kung hugot ikaw nga mag-ingon, “Wala ako motoo nga anaay Dios,” ikaw nagpakita lamang nga wala nimo timbanga ang imong panghunahuna. Kon ikaw wala gayud motoo nga adunay Dios, labing menos, ipadayag ang imong baruganan pinaagi sa paghatag ug pahayag nga magpakita nga ikaw makatarunganon sa imong maayong panghunahuna.

Adunay tulo ka mga paagi sa tawhanong pagpanabot:

1. *Rasyonalismo* – nagkab-ot sa kamatuuran pinaagi sa paggamit sa pangatarungan.
2. *Empirismo* – nagkab-ot sa kamatuuran pinaagi sa imong makit-an, mahikapan, matilawan, madunggan, ug masimhutan.
3. *Pagtoo* – nagkab-ot sa kamatuuran pinaagi sa pagsalig

sa pagkatinugyanan o sa pagkamatitud-anon sa usa ka tawo.

Sa usa ka higayon sa imong pagkinabuhi imong gisandigan ang tulo ka mga pamaagi sa pagpanabot. Apan ang pamaagi nga imong gipakadak-an labaw sa tanan mao gayud ang makaapekto sa imong pagpanglantaw sa kamatuuran.

Karon kung akomoingon, “Adunay Dios,” ang akong gipasabot mao nga ako mitoo pinaagi sa akong pagtoo nga siya anaa sa kanunay—dili lamang minugna sa akong panghunahuna, kung dili usa gayud ka matuud nga Persona nga wala gayuy sinugdanan ug katapusan. Siguro ikaw mangutana, “Kinsa man ang Dios? Unsa man ang Dios?” Kini nga mga pangutana mahimong matubag tungod kay ang Dios nagpadayag man sa Iyang Kaugalingon.

Ikaduhang Sugyot: Ang Dios Nagpadayag sa Iyang Kaugalingon

Kung ang Dios anaa, ug labing-gamhanan ug labaw nga magmamando, busa mosunod nga ang Dios adunay katuyoan sa atong pagkinabuhi dinhi sa kalibutan. Kung ang Dios nagbuhat sa tawo, angayan lang nga Iyang ipaila ang Iyang Kaugalingon ngadto sa mga katawhan. Kung ang Dios anaa sa kanunay ug Siya ang nagbuhat sa katawhan, mosunod lamang nga Iyang ipadayag ang Iyang Kaugalingon sa katawhan ug Siya magapadayag gayud sa Iyang Kaugalingon sa pamaagi nga masabtan sa tawo.

Ikatulong Sugyot: Ang Dios Atong Masabtan

Kun ikaw mopadayon niini nga pagtoon, imong makat-onan nga ang Dios nagpadayag sa Iyang Kaugalingon nganhi

kanato sa paagi nga masabtan. Aduna koy idugang niini nga sugyot: ang Dios nagahimog hinan-ay nga pagpasabot kanato tungod kay ang Dios hingpit man sa Iyang pagkahan-ay. Ug ang pagkahan-ay sa Dios gipakita pinaagi sa usa ka plano nga atong masabtan.

Ikaupat nga Sugyot: Ang Dios Adunay Usa ka Plano

Ang Dios dili lang nga adunay usa ka plano, kung dili ang Iyang plano *hingpit* ug nga kini nag-apil *kanimo*! Ang ikalimang sugyot mobalhin gikan sa paghisgot mahitungod sa Dios nganha kanimo.

Ikalimang Sugyot: Ikaw ang Tumong sa Plano sa Dios

Kon ikaw makaingon, “Ako usa ka tawo, buhi nga tawo, nahisakop ako sa kaliwatan sa mga katawhan,” tungod niana ikaw magaingon, “Ang Dios adunay kaugalingon nga plano alang kanako.” Mao kana nga ikaw ania dinhi sa kalibutan.

Mao kini ang punto: Kun adunay Dios, kun Iyang gipadayag ang Iyang kaugalingon, kun Siya masabtan, kun Siya adunay hingpit nga plano, ug kun Siya adunay hingpit nga plano para sa tanang mga tawo apil na ka, imong kaakuhan karon ang pagpatalinghug sa Dios.

Ikaunom nga Sugyot: Ikaw Adunay Kaakuhan sa Pagpatalinghug sa Dios

Gusto nako nga imong mamatikdan ang pulong “pagpatalinghug.” Walay lain nga gikinahanglan gikan kanimo kondili ang abli nga hunahuna. Walay mga paghaylo—ako gusto lang mohatag kanimo sa kahibalo nga gikan sa Dios pinaagi sa Bibliya. Ang imo lamang pagabuhaton mao ang pagpamati sa

isulti sa Dios pinaagi sa Iyang Pulong. Wala kay mahatag sa Dios dinhi sa kalibutan gawas lang sa pagpatalinghug Kaniya. Maminaw ka og di, imo na kanang kaugalingong pagpili.

Kini tingali lahi ra sa imong gipaabot labi na gayud kon ikaw naanad na sa “rilihiyon.” Ang rilihiyon mao ang pagpaningkamot sa tawo sa pagkab-ot og usa ka relasyon uban sa Dios o pagdayeg gikan sa Dios pinaagi sa tawhanong mga buhat. Ang rilihiyon maoy nagsalipod sa plano sa Dios ug nag-ilad sa mga katawhan. Ang rilihiyon gimugna ni Satanas para maghimo kanimo nga masinupakon batok sa gipadayag nga plano sa Dios sa Bibliya.

Timan-i ako nag-ingon rilihiyon—dili *Kristyanismo*! Ang mga Kristohanong nagtoo sa Bibliya nagbarog nga ang buhat lamang sa Dios pinaagi kang Jesu-Kristo maoy bugtong naghatag ug paagi sa kaluwasan ug wala nay katapusan nga relasyon uban sa Dios. Ingon nga “kahayag sa kalibutan” si Jesu-Kristo usab nagpahayag sa plano sa Dios (Juan 8:12). Ang Kristyanismo nagsangyaw sa paagi sa Dios alang sa kaluwasan ngadto sa tibuuk kaliwatan sa katawhan.

Tungod kay ang tumong niini nga sukaranong kurso mao man ang pagpasabot sa plano sa Dios, ibalik nato paghisgot ang mga pasiunang puntos sa atong introduksiyon.

1. Ang pagkaadunay Dios.
2. Ang Dios nagpadayag sa Iyang Kaugalingon.
3. Ang Dios atong masabtan.
4. Ang Dios adunay usa ka plano.
5. Ikaw ang tumong sa plano sa Dios.
6. Ikaw adunay kaakuhan sa pagpatalinghug sa Dios.

Kon ikaw modawat niini nga mga sugyot ingon nga tinuud, nan imong giila nga ang Dios adunay plano alang kanimo. Apan hinumdumi nga ang hingpit nga plano sa Dios kusganon gayud nga magabatok sa imong kinaiyang pagkatawhanon, sa imong

mga apan ug pagkadili hingpit. Dili igsapayan nga bisan unsa ka pa kamaayo sa imong pagtoo, ang imong tawhanong kinaiya dili gayud makaabot sa Diosnong hingpit nga sukdanan sa pagkamatarong. Ang imong pagkatawhanon naghimog babag nga nagbuwag kanimo ug sa Dios; dili gayud ikaw makabaton ug relasyon uban Kaniya.¹ Dili mahimo nimo ang makig-uban sa Dios sa imong masalaypon nga kahimtang. Busa, ang Dios nakakita ug pamaagi sa pagdala kanimo ngadto sa Iyang Kaugalingon; Siya nagdisenyo ug tulo ka bahin nga plano sa grasya aron nga ikaw makaduol Kaniya.

Bahin Uno: Kaluwasan

Bahin Dos: Ang imong tibuuk kinabuhi ingon nga magtotoo

Bahin Tres: Eternidad

Ilalum sa plano sa Dios, ang Dios maoy naghatag sa tanan pinaagi sa grasya alang sa tawo sugod sa kaluwasan hangtod na sa eternidad.² Ang grasya mao ang paagi sa Dios sa paghatag sa Iyang walay bugti nga kaayuhan ngadto sa makasasala nga katawhan. Wala gayuy mahimo ang tawo para iyang maangkon ang grasya sa Dios. Ang grasya mao ang walay kinutuban nga buhat sa Dios alang sa tawo pinasikad sa kaluwasan nga buhat ni Jesu-Kristo didto sa krus (Isaias 30:18).

1. Ang babag usa ka lig-on nga ali nga maoy nagbulag sa tawong makasasala gikan sa hingpit nga Dios ug nagpugong kaniya sa pagbaton ug usa ka pakigrelasyon uban sa Dios (Mga Taga-Roma 5:12). Ang babag gilangkuban sa sala (Mga Taga-Roma 3:23), ang silot sa sala (Mga Taga-Roma 6:23a), ang atong tawhanong pagkahimugso (Mga Taga-Efeso 2:1), kinaugalingong pagkamatarong sa tawo (Isaias 64:6a), ang hingpit nga kinaiya sa Dios (Mga Taga-Roma 3:12b), ang kahimtang sa tawo diha kang Adan (1 Mga Taga-Corinto 15:22a). Tan-awa ang R.B. Thieme, Jr., *The Barrier* (Houston: R.B. Thieme, Jr., Bible Ministries, 2003). Tapos niini, ang mga pagtandi unya sa mga pagtulon-an para sa akong mga sinulat nga libro maghatag lamang sa ngalan sa nagsulat, titulo, petsa sa pagmantala (sa unang panimaan), ug ang pahina (mga pahina).

2. Thieme, *A Matter of Life & Death* (1990); *Giving: Gimmick or Grace?* (1990), Pakapin sa Basahon A.

BAHIN UNO: KALUWASAN

Ang plano sa Dios alang sa imong kinabuhi nagsugod didto sa krus. Ang krus mao ang yawe alang sa plano sa kaluwasan. Sa dihang si Jesu-Kristo nagbitay didto ibabaw sa krus taliwala sa langit ug sa yuta, Siya gihukman alang sa tanang sala sa kaliwatan sa tawo—kaniadto, karon ug umaabot (Juan 3:16, 36; 2 Mga Taga-Corinto 5:21; Mga Taga-Colosas 2:24; 1 Pedro 3:18). Siya ang gipuli para sa atong kasal-anan; Iyang gidawat ang silot sa sala para kanato. “Siya gayud mao ang nagpas-an sa atong mga sala sa Iyang kaugalingong lawas sa krus” (1 Pedro 2:24a). Bisan kinsa nga sakop sa katawhan mahimong maluwas ug makabaton ug walay kinutubang relasyon uban sa Dios sa yano lamang nga pagtoo diha kang Jesu-Kristo ingon nga Iyang Manluluwas.

“Too kang Ginoong Jesus, ug ikaw maluwas.” (Buhat 16:31)³

“Ug walay kaluwasan pinaagi kang bisan kinsa pa nga lain; kay walay bisan kinsa pang lain nga ngalan sa silong sa langit nga gikahatag ngadto sa mga tawo, nga pinaagi niini kita maluwas.” (Mga Buhat 4:12)


Apan sa tanang midawat Kaniya, mihatag Siya og katungod nila nga mamahimong mga anak sa Dios, *bisan* ngadto kanila nga mitoo sa Iyang ngalan.” (Juan 1:12)

3. Ang tanang Kasulatan niini nga libro ug gihubad sa Binisaya nagagikan sa gipalapdan ug makuting pagtoon sa Bibliya ni R. B. Thieme, Jr. Ang mga komentaryo nga anaa sa sulod sa korete naghatag ug dugang katin-awan sa NASB nga paghubad nga gitudlo panahon sa mga pagtoon sa Bibliya (anaa kini sa MP3 CD gikan sa R. B. Thieme, Jr., Bible Ministries, Houston, Texas).

Ang bahin uno sa plano sa Dios nagpasig-uli sa kinatibuk-an nga pagkadaotan sa tawhanong kinaiyahan uban sa Iyang pagkabalaan, usa ka pulong nga naghisgot sa Iyang hingpit nga pakamatarong ug hustisya. Sa pagtudlo sa mga pasiunang pagtulon-an sa Dios, ako kasagaran magsugod sa pag-usisa sa karakter sa Dios, Iyang balaang esensiya.⁴ Pero, karon ako magsugod sa pagtoon sa imong esensiya aron ikaw masayod ngano nga ang Dios kinahanglang mosulbad sa problema sa babag nga anaa taliwala kanimo ug Kaniya.

Ang Esensiya sa Tawo

Magsugod ako kanimo sa panahon sa imong pagkahimugso. Wala ka pa masayod niini nga kamatuuran, pero sa panahon sa imong pagkahimugso nahimo kang tawo nga adunay kalag. Ang kalag mao ang dili makita, dili mahikap nga esensiya sa tawo, ang tinuud nga tawo. Ang dayagram nagpakita sa esensiya sa kalag sa tawo sa iyang pagkahimugso nga gikan sa Dios.



ESENSIYA SA KALAG

4. Thieme, *The Trinity* (2003), 5-16.

KAUGALINGONG-PAGKAHIBALO

Sa imong pagkatawo, wala pa ikaw makamatikod sa imong pagkaanaa. Sa nagtubo ka na adunay motawag kanimo sa imong ngalan, ug ikaw motubag. Sa dihang nakita nimo ang imong kaugalingon sa samin, imong gidugtong ang imong ngalan sa imong dagway. Sa kadugayan, imong nasayran nga ikaw usa ka tawo.

MENTALIDAD

Tataw kaayo, nga ang mentalidad sa usa ka bag-ong natawo nga bata wala pa gayud maugmad; kon dili pa, anad na unta siya mosulti sa panahon nga siya gipanganak. Ang mga pamulong kinahanglang makat-unan; ang mga pulong kinahanglan nga itaputapu. Ang tanang pagkahibalo sa panghunahuna makabot lamang pinaagi sa mga pamulong, mao nga ang imong kamaayo sa pagpamulong maoy mohatag kanimo sa abilidad sa pagpangatarungan.

KABUBUT-ON

Ang kabubut-on maoy tighimog-desisyon sa imong kalag. Ang kabubut-on sa usa ka bata hingpit nga gigamhan sa iyang palibot. Tungod kay wala pa siya'y pamulong, ang bata dili makasulti og, "gigutom ko." Ang iya ra gayong mahimo mao ang pag-ukab sa iyang baba ug ang paghilak. Kon ang nag-atiman kaniya makalimot sa pagpakaon kaniya o pag-ilis sa iyang hapin, ang kabubut-on sa bata makita lamang sa mga tingog nga mogula sa iyang baba. Apan dili pa kini ang hingpit nga kaugmaran sa kabubut-on.

TANLAG (SUMBANAN UG SUKDANAN)

Ang bata nahimugso nga walay ngipon, pero motubo ra pud ni. Pareho ra, nga ang bata nahimugso nga may tanlag apan wala pa kini'y sumbanan o sukdanan. Kini mohinayhinay sa pag-ugmad pinaagi sa pakig-uban, pagkat-on, ug sa espirituhanong pagbansaybansay. Sama ra sa bata nga makabaton ra gayud og mga ngipon, ingon man usab nga siya magpatubo sa iyang mga sumbanan ug mga sukdanan. Apan ang maong mga sumbanan ug mga sukdanan adunay depekto tungod sa kinaiyang makasasala.

Ang Kinaiyang Makasasala

Ang kinaiyang makasasala maoy nakapahugaw sa katawhan nga walay bisan usa ang makaduul sa hingpit nga esensiya sa Dios o sa pagpahimuut Kaniya. Bisn pa dili kini kabahin sa kalag, ang kinaiyang makasasala maoy tinubdan sa pag-rebelde batok sa Dios, og ang gigikanan sa tentasyon aron sa pagsupak sa Dios. Ang kinaiyang makasasala naningkamot sa pag-inpluwensiya ug pagkontrolar sa kalag. Kining dunot nga kinaiya mitungha isip direkta nga resulta sa unang sala nga gibuhat ni Adan.

Busa, pinaagi lang sa usa ka tawo [Adan] ang sala [kinaiyang makasasala] misulod sa kalibutan, ug ang [espirituhanon] kamatayon pinaagi sa sala, ug tungod niini ang kamatayon mikuyanap ngadto sa tanang mga tawo, sanglit ang tanan nakasala man.
(Mga Taga-Roma 5:12)

Ang kinaiyang makasasala nagpuyo diha sa selyulang gambalay [cell structure] sa lawas ug nga kini atong nabatonan pinaagi sa pagpanganak gikan pa ni Adan hangtud na sa iyang

mga kaliwatan (Mga Taga-Roma 6:6; 7:5, 18).⁵ Gawas kang Ginoong Jesu-Kristo, ang matag tawo nahimugso nga may kinaiyang makasasala.⁶ Ako natawo nga anaa usab niini; ikaw natawo nga anaa usab. Ang kinatam-isan ug dagway nga batang gamay adunay kinaiyang makasasala!

Ang mga inahan maka “ooh” ug “ah” sa ilang mga anak nga mag-ingon, “Diba siya maanyag!” “Diba siya angayan!” “Tan-awa ang akong bililhon nga anak!” Nasayod ka ba sa panghunahuna sa Dios mahitungod sa mga gagmayng kabataan? Makugang ka gayud niini. Dili gayud madawat sa Dios ang mga bata. Kita motan-aw sa lawasnong panagway sa bata, pero ang kinaiyang makasasala mao ang makit-an sa Dios. Bisan kon pila pa kabuuk ang modayeg sa kaanyag ug pagka-inosente sa usa ka gamayng bata, hinumdumi: Bugtong usa ra ka bata ang nahimong ambongan para sa Dios—si Jesu-Kristo ra!

Ang hinungdan ngano nga ang Dios nakakita sa katahum ni Jesu-Kristo apan ang ubang bata dili madanihon, kini dili tungod sa ilang panagway. Ang gagmayng mga bata dili gayud madawat sa Dios tungod kay nahimugso silang patay espirituhanon—nahimulag sa Dios (Mga Taga-Roma 5:12; cf., Mga Taga-Efeso 2:1).⁷ Si Ginoong Jesu-Kristo ra maoy bugtong bata nga natawo nga walay kinaiyang makasasala busa hingpit Siya nga madawat sa Dios (1 Pedro 2:22). Atong tan-awon ang mga bata sama sa pagtan-aw sa Dios. Ako natawo nga patay sa espirituhanong kahimtang; ikaw natawo nga patay sa espirituhanong kahimtang. Gawas kang Ginoong Jesu-Kristo, ang matag usa kanato nga nahimugso ug ang mga mahimugso

5. Ang kinaiyang makasasala mao ang “daang tawo” nga gihisgutan sa Mga Taga-Efeso 4:22 (KJV); ang kinaiyahan ni Adan diha sa ‘unod’ nga gihisgutan sa Mga Taga-Roma 8:3-4; ang prinsipyo sa “sala” diha sa Mga Taga-Roma 7:8-20. Tan-awa sa Thieme, *The Barrier; The Integrity of God* (1998), 49-53.

6. Tungod kay ang pagkatawhanon ni Kristo gipanamkon man pinaagi sa Espiritu Santo, Siya natawo nga walay gipanunod nga kinaiyang makasasala (Mateo 1:18). Tan-awa ang Thieme, *The Blood of Christ* (2002), 10-11.

7. Thieme, *The Barrier*, 5.

pa adunay kinaiyang makasasala ug patay sa espirituhanong kahimtang.

Adunay mga tawo nga anaa sa sayup nga panghunahuna nga sa dihang makahimo ka sa unang pagpakasala, ikaw mamatay espirituhanon. Dili kana tinuud! Bisan pa ikaw mahimugso nga buhi, sa samang higayon usab ikaw natawo nga patay espirituhanon. Ang Dios dili maghukom kanimo tungod sa imong nabuhat nga mga sala. Ang Iyang pagtan-aw wala mag-agad sa unsay imong gibuhay, tungod kay isip bag-ong nahimugso ikaw wala pa makabuhat ug maayo o dautan. Ang pagtan-aw sa Dios gisandig diha sa kamatuuran nga ang imong lawas nahugawan sa kinaiyang makasasala ug ikaw patay espirituhanon.

Sa dihang ikaw motubo na sa panglawas ug pangisip, magasugod ka na og buhat og mga sala. Siguro ang unang mga pulong nga imong malitok mao ang “Mama” o “Dada”. Kadugayan ikaw makaingon na, “*Dili*, dili gyud ko!” Mao na kini ang imong kabubut-on nga milihok na subay sa imong kinaiyang makasasala. Matag kinaiyang makasasala adunay daghang pamaagi ug magbuhat og labing maayo ug labing dautan. Busa, aron nga imong masabtan ang imong kaugalingon, kinahanglan sabton sa nimo ang imong kinaiyang makasasala.

Produksiyon sa Kinaiyang Makasasala

LUGAR SA KAHUYANG

Ang kinaiyang makasasala adunay lugar sa kahuyang diin nagagikan ang tanang mga pagdani sa pagbuhat og kinaugalingon nga mga sala.⁸ Anaay tulo ka mga kategoriya

8. Ang pagtintal sa pagpakasala dili kana sala mismo. Sa diha nga ang imong kabubut-on mosugot sa pagtintal kana usa ka sala. Ang tinubdan sa pagtintal mao ang imong kinaiyang makasasala. Ang tinubdan sa pagpakasala mao ang imong kabubut-on.

sa kinaugalingon nga sala.

Mga Sala sa Panghunahuna. Unsa man kining sala sa panghunahuna? Garbo, pangabubho, kaligutgot, pagdumot, pagpanimalos, pagkasupakero, kasina, pagbati ug kadautan, kahadlok, kabalaka, kaguul, kalooy sa kaugalingon. Mao kini ang pinakagrabe nga mga sala tungod kay madali kining mahimong hugpong sa mga sala nga maoy makaguba sa espirituhanong pagkinabuhi.⁹ Tungod kay ang tanan aduna may kinaiyang makasasala, dili kalikayan nga sa madugay o sa madali kitang tanan makabuhat unya niining maong mga sala sa panghunahuna.

Karon, kon magsugod nako ug hisgot mahitungod sa sala, likayi ang hunahunang pangdependa. Kun akong ‘matumban ang mga tudlo sa imong tiil,’ hinumdumi gayud, nga wala ako magsunodsunod kanimo. Usa ka sekreto sa pagkat-on mao ang pagbaton ug ‘kalma nga pangisip.’ Kalma lang! Basin pa ikaw usa ka grabeng magbubuhay sa mga sala sa panghunahuna. Wala ka mag-inusara. Walay bisan usa ka tawo, gawas ni Jesu-Kristo, nga wala makahimo ug sala sa panghunahuna matag karon ug unya. Bisan gani mismo ang pipila ka mga Kristohanon nakahimo pagbuhat og mga ‘sumpaysumpay nga mga sala.’¹⁰ Pero, ang punto nga gusto nako nga imong mahinumduman mao nga kini usa lamang ka *kategoriya* sa sala. Ang imong mismong *gihunahuna* pwede kana nga sala—usa ka sala sa panghunahuna.

Mga Sala sa Dila. Kini nga kategoriya sa sala naglakip sa pangdaot, paghukom, pagbugalbugal, panglibak, pagsaway, ug pagpamakak. Pwede nimong himoon ang pipila niining maong mga sala i-apil sa minalditong pagdaot. Tan-awa og giunsa

9. Thieme, *Christian Integrity* (2002), 173-82.

10. Ang sumpaysumpay nga pagpakasala maoy paghimo og sala gikan sa laing sala. Tan-awa Thieme, *Isolation of Sin* (2000) 10-12.

paghulagway ang dila sa libro ni Santiago:

Maingon usab, ang dila maoy usa ka gamayng bahin sa lawas, ug *apan* gipanghambog niini ang mga dagkong butang. Tan-awa, pagkadako sa lasang nga masunog sa usa ka gamayng kalayo! Ug ang dila maoy usa ka kalayo, ang *maong* kalibutan sa pagkadautan; usa ka bahin sa atong lawas nga naghugaw sa tibuuk lawas, nagduslit ug kalayo sa lakaw sa *atong* kinabuhi, ug dinuslitan sa kalayo sa impyerno. (Santiago 3:5-6)

Usa ka palito, usa ka baga, ug ikaw makasunog sa usa ka lasang. Usa ka pulong makamugna og kagubot sa imong kinabuhi ug sa mga kinabuhi sa uban.

Mga Sala sa Buhat. Ang mga sala sa buhat naglakip sa ubang mga tawo, sama sa sala sa dila. Mao nga tataw kaayo, nga maapektohan gayud ang ubang mga tawo sa imong kinaiyang makasasala. Pagpatay, pagpanapaw, paghuboghubog, ug pagpangawat maoy mga sala sa buhat nga gihinganlan sa Bibliya nga mga sala (Exodo 20:13-15, 17; Mga Taga-Roma 13:9).

Adunay daghan usab nga mga buhat hain ang nahisalaag ug kinaugalingong nagpakamatarong nga mga katawhan mitawag nga sala, pero ang Bibliya wala diay. Kini nga mga kwestyunable nga mga binuhatan o mga kalihukan mohamtong lamang sa mga pagdili ug personal nga pihigpihig o kapritso. Siguro daghan kag mga gidili sa imong rilihiyon ug nga kini imong gitooan nga mga sala. Tungod lang kay *ikaw* naghunahuna nga ang usa ka butang nga gihimo sa usa ka tawo sala wala nagpasabot nga ang *Dios* naghukom niini nga sala. Kinahanglan imong sundon unsay gisulti sa Bibliya.

Kun ikaw nagtoo nga sa pag-inom og usa ka baso nga bino usa ka sala ug ang tawo dili na espirituhanon samtang

malipayong nag-inom sa usa ka basong bino sa panihapon, usa lamang kana ka pagdili, og dili usa ka sala. Ang Bibliya wala mag-ingon, “Ayaw pag-inom ug usa ka baso nga bino sa panihapon.” Hinoon, matod pa sa Bibliya ang bino mahimong makaayo kon sa kasarangan lang (1 Timoteo 5:23). Ang paghuboghubog maoy gipagdili sa Bibliya (Mga Taga-Roma 13:13).¹¹

Dili usab usa ka sala ang pagsul-ob ug pula o itum o sa pagsunod sa imong ganahan mahitungod sa bisti. Motoo ka og sa dili, dili sala para sa mga babaye nga magsuut og sinina nga makapanindot. Pipila kaninyo maglisod niini tungod kay naanad na man mo sa pagtan-aw sa usa ka babaye nga magsuut ug nindot nga sinina ug magpagwapa sa iyang dagway nga dili kini siya talahuron. Siguro imong sawayon ang usa ka babaye nga imong gitooan nga nagpasulabi sa iyang pangbisti. Ang maong pagsaway usa ka ehemplo sa pagdili ug kinaugalingon nga pagpihigpihig nga tawhanon lamang og kini nagsalikway sa mga Kristohanon nga adunay lahi ra nga hilig o kaagi kay sa imoha.

Daghan kaninyo adunay malipayon nga kinaiya ug daghan usab ang may masulub-on nga kinaiya. Pipila ninyo kalma lang ug pipila usab dili. Ug adunay uban nga anaa sa tungatunga. Dili malipayon ug dili usab masulub-on. Gitawag kini sa taga-Scotland og *dour* o walay kadasig. Dili sala ang mopahiyum; dili sala ang magmug-ot. Ang Bibliya wala gayud mag-ingon, “Ang kinabuhi para sa usa ka magtotoo dili katre nga balahibo, igsoon; maayo pa nga subo ang imong hitsura. Ayaw pagpangahas sa pagpahiyum mahitungod sa klaseklaseng butang tungod kay ang Dios nagdumot sa tawo nga mopahiyum.” Kon ang Kristohanon mokatawa o siya murag malipayon, ang mga tawo nga nagpangdili siguro magpadaplin ug moingon, “Tan-

11. Daghang mga katawhan nga dili gyud angayan nga moinom ug ilimnong makahubog tungod sa ilang mga kaluyahon nga dili mapugngan kung bahin na sa pag-inom. Tan-awa ang Thieme, *Daniel Chapters One through Six* (1996), Pakapin sa Basahon H.

awa ra kanang mga taphaw nga mga tawo; dili sila kaayo espirituhanon, di ba?” Ang imong kinaiya dili maoy sukod sa imong pagkaespirituhanon. Ang pagbaton sa mabibo o makiuban-ubanong nga kinaiya dili kana sala.

Sama sa kalag nga dili makita, mao usab ang kinaiyang makasasala dili makita. Apan, anaay usa ka Persona nga nakakita sa imong kinaiyang makasasala sa matag takna ug Siya mao ang Dios. Samtang ang kinaiyang makasasala sekretong nagtintal sa imong kalag ug ang imong kalag sekretong misugot o sekretong misukol sa tentasyon, sa higayon nga makasala ka, sa bisan unsa nga kategoriya sa sala, ang Dios makakita sa sala.

LUGAR SA KALIG-ON

Isip dugang sa mga sala gikan sa imong lugar sa kahuyang, ang imong kinaiyang makasasala adunay lugar usab sa kalig-on nga diin kini nagmugna og mga maayong buhat. Gitawag og tawhanong pagkamaayo, kini nga mga binuhatan gihimo pinaagi sa kusog sa “unod.” Pareho ra ang magtotoo ug dili-magtotoo nga naggamit sa ilang kaugalingong mga kabubuton paghimo sa tawhanong pagkamaayo. Ang mga maayong binuhatan nga nahimo sa usa ka magtotoo ubos sa pagkontrolar sa iyang kinaiyang makasasala walay kalainan sa maayong mga binuhatan nga nahimo sa dili-magtotoo.¹²

Ang Bibliya nagmando sa paghimo sa buhat sa kalooy sama sa pagpakaon sa gigutom, paghatag ug kapasilungan sa mga walay panimalay, paghatag sa mga kabus ug sa nanginahanglan, ug uban pang mga maayong buhat (Isaias 58:7, 10; Ezequiel 18:7-8, 16-17; Santiago 2:15-17; 1 Juan 3:17) kini ilalum sa mga

12. Ang magtotoo nga adunay wala masugid nga sala sa iyang pagkinabuhi dili kana siya espirituhanon, apan “unodnon,” gikontrolar kana siya sa iyang kinaiyang makasasala. Tan-awa ang pahina 17. Tan-awa usab ang Thieme, *Reversionism* (2000), 14-18.

balaod sa balaanong katukuran. Para sa usa ka dili-magtotoo, ang pagsunod niining maong mga balaod maoy tinubdan sa lumalabay nga kalipay, pero bisan ang paghimo niining maong mga binuhatan dili gayud makahatag kanimo og pabor gikan sa Dios didto sa katapusang paghukom sa Dakong Maputing Trono (Pinadayag 20:12).¹³

Ang nakadaot, kadaghanan sa mga tawo nagahimo og mga maayong binuhatan tungod kay gusto nila nga mahimut-an sila sa Dios ug angayan makasulod sa langit: nagahatag sila og kwarta; naningkamot sila sa pagtabang sa mga katawhan; nagpamembro sa simbahan.¹⁴ Ang rilihiyon maoy kinadak-an nga nagpaluyo sa tawhanong pagkamaayo. Pero walay lugar sa plano sa Dios sa kaluwasan ang tawhanong pagkamaayo (2 Timoteo 1:9). Ang tanan nga tawhanong pagkamaayo sa kalibutan dili gayud makaluwas bisan mismo sa usa ka tawo.¹⁵

Unsa may panglantaw sa Dios sa tawhanong pagkamaayo? Isaia 64:6b nag-ingon: “Ang atong tanang maayong binuhatan [tawhanong pagkamaayo] nahisama sa usa ka mahugaw nga trapo!”—usa ka menos lamang nga pagpahayag sa labing mangil-ad nga butang.

Tungod kay ang tanan nga tawhanong pagkamaayo nagagikan man sa kinaiyang makasasala, dili kini makaabot sa sukdanan sa Dios, wala kiniy espirituhanon o mahangturon nga bili, ug dili kini gantihan sa langit (1 Mga Taga-Corinto 3:11-15).

Unsaon man nako paghulagway sa pagsalikway sa Dios sa tawhanong pagkamaayo? Malagmit kamong tanan nakasulay na og kuyog sa usa ka tawo nga nagatoo sa iyang kaugalingong

13. Tan-awa ang pahina 17.

14. Ang mga tawhanong pagkamaayo nga nagsuway sa paghinlo sa kalibutan nga gigamhan sa yawa kini gipaluyuhan ni Satanas ug dili malikayan mosangpot lamang sa dautan (Deuteronomio 15:11; cf., Mateo 26:11; Marcos 14:7; Juan 12:8). Dinhi sa kalibutan nga dili hingpit, ang Dios naghatag sa bugtong molungtad nga sulbad—ang kinaugalingon, espirituhanon nga mao kini: pagtoo diha kang Kristo ug ang espirituhanong pagtubo.

15. Thieme, *The Slave Market of Sin* (1994), 22-25.

pagkamatarong ug pagkawalay sayup. Midayeg ba kamo sa iyang gibuhat? Malagmit wala gayud! Sa nagdako ako, ang akong igsoon nga babaye sama sab niini. Akong mahinumduman nga sa daghang higayon sakto siya unya ako sayup. Sa tanan nga gihimo nako nga pagsupak, adunay usa ka butang nga dili gayud nako makalimtan. Akong nahinumduman nga ako siyang gihanaan ug sumbag apan gipahimangnoan ako sa akong amahan, “Kun imo gani siyang pasakitan imo gayud kining pagamahayan!” Sa tanang panig-ingnan sakto siya, pero wala ako makadayeg sa iyang kaugalingong pagkamatarong. Adunay panahon sa imong kinabuhi nga siguro nakasinati ka og kasilag batok sa usa ka tawo nga garboso og kinaiya nga maoy nagtabon sa ilang pagkaensakto. Isip usa ka pagtandi, mao kini ang pagtan-aw sa Dios ngadto sa tawhanong pagkamaayo: *Ang husto nga butang gibuhat sa sayup nga paagi*—usa ka supak nga pagpadayag sa kaugalingong pagkamatarong. Ang Dios dili gayud makadawat niining kinaiyaha.

Ang plano sa Dios naglihok pinaagi sa balaang pagkamaayo, dili gayud sa tawhanong pagkamaayo (Mga Taga-Efeso 2:10)!¹⁶ Sama nga ang Dios naghukom batok sa sala, mao usab ang pagsalikway Niya sa tawhanong pagkamaayo. Sa dihang si Kristo namatay sa krus isip puli alang kanato, ang problema sa sala nasulbad na. Sa samang higayon, ang tawhanong pagkamaayo Iyang gisalikway tungod kay ang buhat ni Kristo balaanong pagkamaayo man.

Kita Iyang giluwat, dili tungod sa mga binuhatan nga nahimo nato sa atong *pagkamatarong*, kondili tungod sa Iyang kalooy [grasya], pinaagi

16. Ang balaanong pagkamaayo mao ang buhat o mga binuhatan nga gihimo sa usa ka magtotoo ilalum sa pagpuno sa Balaang Espiritu. Ang balaanong maayong binuhatan lamang mao ang madawat sa hingpit nga sukdanan sa Dios. Ang balaanong pagkamaayo lamang maoy dunay undanon ug walay katapusang bili ug busa makadawat gayud og pag-ila ug ganti gikan sa Dios didto unya sa langit.

sa paghugas sa pagkatawo-pag-usab, ug sa pagkabag-o diha sa Balaang Espiritu. (Titus 3:5, ang hiwi nga mga letra gidugang ra)

Ang isyu sa kaluwasan mao ang buhat ni Kristo—balaanong pagkamaayo—batok sa tawhanong mga binuhatan—tawhanong pagkamaayo (Mga Taga-Efeso 2:8-9).

Sa pagkakaron gikinahanglan makaamgo ka nga aduna kay gikitbit nga gibug-aton diha sa imong lawas. Apan aduna pay daghan. Ingon nga dili pa igo ang mga lugar sa kahuyang ug kalig-on, ang kinaiyang makasasala aduna pay mga hilig.

Mga Hilig sa Kinaiyang Makasasala

Adunay duha ka mga hilig sa matag kinaiyang makasasala: una mao ang pagdili sa kaugalingon—pagpugong sa kaugalingon nga mosangpot sa kinaugalingong pagkamatarong; ang ikaduha mao ang pagkamaulagon—pagtagbaw sa kaugalingon nga mosangpot sa kaulag. Kasagaran, ang tawo mopadulong gayud ngadto sa iyang naandang pamaagi sa binuhatan kon siya ubos sa pagkontrol sa kinaiyang makasasala. Mao nga anaay mga tawo nga magpugong sa ilang kaugalingon, ug sa laing bahin adunay mga tawo nga magpatuyang sa ilang kaugalingon. Pero, walay permanente nga paagi sa pagkahilig. Ang usa makabaton sa kasagaran ngadto sa pagdili sa kaugalingon ug usahay moadto siya sa pagkamaulagon, o anaa sa kaulag unya mokalit lang og buhat diha sa pagpugong sa iyang kaugalingon o diha sa kinaugalingong pagkamatarong.



Pangibog sa Kinaiyang Makasasala

Laing timailhan sa kinaiyang makasasala mao ang paagi sa pangibog. Unsa man ang pangibog? Ang pangibog mao ang dili ensakto og usahay dili na matagbaw nga tinguha. Kini nga tinguha maoy mohatag og kusgan kaayo nga kadasig hangtud nga ang kaibog molamon na kanimo ug mao na ang maghari sa imong pangisip ug mga panglihok.

Ang pagkahangol sa pagpadayeg sa uban—ang tinguha alang sa pagkailado, sa pagpataas sa kaugalingon—mao ang sukaranong tinubdan sa kadasig. Mao kini ang hinungdan ngano nga ang mga kabatan-onan makapanghagit sa ilang mga kauban sa pagbuhat sa walay hinungdang mga binuhatan—aron

makuha ang pagtagad sa ilang mga barkada. Ang mga hamtong nga adunay kahangol sa pagdayeg sa uban nahisama ra usab sa mga bata, bisan pa kon ang ilang pamaagi sa pagkuha og pagtagad sa uban migamit na og dinagko nga pamaagi. Pero bisan pa og bata o hamtong, matag-usa naglihok sulod sa kaugalingong panghunahuna para makakuha og pagtagad gikan sa uban. Pananglitan, ang pag-ila mahimong magsugod sa mga talagsaong pagkab-ot sa paugnat sa kusog, sa kahibalo, sa katilingbanong buhat, o sa propesyon. Ang maong nakab-ot nga pagkailado nahimong dakong kadasig sa pagkinabuhi.

Ang pagkawalay ayo niini mao nga ang kadasig sa pagkuha sa pagdayeg sa uban mahimong magapasiuna bisan pa sa pagsugod sa Kristohanong pagkinabuhi. Kasagaran ang bag-ong mga magtotoo nga ilado sa ilang unang kalibutan-ong pagkinabuhi, awhagon sa paghatag ug testimonya kon giunsa niya pag-ila si Kristo isip Manluluwas. Ang tanan mahinangop og gusto nga maminaw sa mga sikat nga basketbolista, reyna sa kaanyag, sa mga nagmalampuson sa kinabuhi o sa mga ilado nga mga tawo. Siguro kini usa ka maayong pakigrelasyon sa publiko, pero dili gayud kini mao ang pagka-Kristohanon. Kini nga klase sa pag-ila mahimo hinoong makapadasig sa tawhanong pagkamaayo ug makapagana sa pangibog. Tungod kay ang mga magtotoo nga ilado sa tawhanong pagkinabuhi wala kini nagahimo kanila nga mas labaw pa sa panan-aw sa Dios kay sa usa ka tawo nga dili ilado. Kon ang “Yanong Tawo” modawat ni Kristo, pareho ra siya ka importante sa mga mata sa Dios sama sa “Ilado nga Tawo.”

Ug sa pagbungat sa iyang baba, si Pedro miingon: “Sa pagkatinuud ako nakasabot na *karon* nga ang Dios wala diay pinalabi sa mga tawo, apan sa matag-usa ka nasud ang tawo nga nagbaton og kahadlok [pagtahud] Kaniya ug nagbuhat sa unsay husto [pagbuhat sa plano sa Dios] gikahimut-an gayud Niya.” (Mga Buhat 10:34-35)

Ang kahangol alang sa pagdayeg sa uban magasangpot sa kaibog sa gahum. Sa dihang ang mga tawo magsugod na sa pagkuha ug mga pagtagad gikan sa uban, gusto na nila nga magtukod ug kapunongan sa mga katawhan nga mohatag og pagdayeg ug pagtagad aron kini sila ilang magamhan. Adunay pipila ka mga tawo nga giharian pud sa makihilawasong kaibog ug kini ibaylo nila sa tinuud nga gugma. Ang uban usab adunay kaibog sa mahalon nga mga butang, usa ka kahimtang nga nagagahum sa kadaghanan sa atong katilingban kauban sa walay katagbawan nga tinguha sa pag-angkon niini. Aduna pay ubang mga kaibog, pero kini ra ang mga kasagaran.

Ang atong napanunod nga kinaiyang makasasala usa kini ka makanunayon, og mabangis nga kauban. Dili igsapayan kon unsa ang hilig nga labaw o giunsa paglihok sa atong kinaiyang makasasala, kita walay mahimo sa pagtangtang niini. Bugtong ang Dios lamang sa Iyang grasya ang makahatag ug kasulbaran sa atong problema sa sala.

Tungod kanato Siya nga wala makasinati og sala *gihimo* Niya nga sala, aron diha Kaniya kita mahimong pagkamatarong nga anaa sa Dios. (2 Mga Taga-Corinto 5:21)

Ang plano sa Dios naghatag ug kasulbaran sa sala diha sa duha ka bahin, bahin uno ug dos, dili lang kay kita Iyang giluwag pinaagi sa grasya, kon dili kita usab magbuhat sa Kristohanong pamaagi sa pagkinabuhi pinaagi sa grasya (2 Pedro 1:3-4).

BAHIN DOS: ANG MAGTOTOONG NGA ANAA SA PANAHOON

Sa takna nga ikaw motoo ni Kristo, aduna ka dayoy

kahigayonan nga mosulod dihadhiha sa bahin dos sa plano sa Dios nga akong gitawag nga “Operasyon sa Grasya.” Kini nga plano gimugna aron ikaw makatukma sa kalipay sa Dios pinaagi sa pagkat-on ug paggamit sa panghunahuna ni Kristo (1 Mga Taga-Corinto 2:16). Ang panghunahuna ni Kristo anaa aron magamit sa matag magtotoo isip doktrina sa Bibliya. Bisan pa nga ang kinaiyang makasasala dili gayud matangtang sulod sa bahin dos sa plano sa Dios (Mga Taga-Roma 7:14-25), pinaagi sa ministryo sa Balaang Espiritu (Mga Taga-Galacia 5:16) ug pagtubo espirituhanon sa doktrina sa Bibliya (2 Pedro 3:18) ang kinaiyang makasasala mapugngan aron ikaw makahatag ug daghang higayon aron sa pag-alagad sa Dios ug pag-ambit sa Iyang kalipay.¹⁷

Usa ka Butang nga Daan, Usa ka Butang nga Bag-o

Sa higayon nga ikaw modawat ni Jesu-Kristo nga imong Manluluwas, ang Dios nagbuhat alang kanimo ug kuwarenta ka mga butang espirituhanon sulod sa bahin dos.¹⁸ Pero adunay usa ka butang nga dili Niya pagabuhaton alang kanimo—dili Niya tangtangan ang kinaiyang makasasala! Ikaw adunay, paghulam sa usa ka panultihon gikan sa pagkasal, “butang nga daan ug butang nga bag-o.” Ang pagpuyo ug ang pagpuno sa Balaang Espiritu mao ang *bag-o* ug ang imong kinaiyang makasasala mao ang *daan* nga dala sa imong lawasnong pagkahimugso.¹⁹ Ikaw gitawag nga “natawo pag-usab” (Juan

17. Thieme, *God the Holy Spirit vs. The Sin Nature* (2013).

18. Tan-awa ang Pakapin sa Basahon.

19. Ang pagpuyo sa Balaang Espiritu maoy usa ka permanente, ug dili na mausab nga kahimtang nga maangkon sa takna sa kaluwasan sa matag usa ka magtotoo sa Kapanohanon sa Simbahan (Mga Taga-Roma 8:10-11) og nga kini maga-otro sa iyang lawas ngadto na sa usa ka templo (1 Mga Taga-Corinto 6:19) alang sa dungan nga pagpuyo ni Jesu-Kristo isip mao ang ‘Himaya-Shekinah’ ug ang permanenteng pagpuyo usab sa Dios nga Amahan (1 Mga Taga-Corinto 3:16; 1 Juan 4:13-15). Tan-awa Thieme, *The Divine Outline of History: Dispensations and the Church* (1999), 131-33.

3:7). Ang teyolohikal nga pulong sa pagpakatawo pag-usab o espirituhanong pagpakatawo mao ang pagkatawo-pag-usab. Sa takna sa kaluwasan, ikaw milabang gikan sa pagkapatay espirituhanon ngadto na sa pagkabuhi espirituhanon (Juan 3:6) ug ang Dios Espiritu Santo nagmugna diha kanimo og usa ka tawhanong espiritu aron sa pagbutang og kinabuhing dayon diha kanimo. (Juan 3:3-8; Titus 3:5) Busa, ikaw natawo pag-usab diha sa sulod sa pamilya sa Dios (Juan 1:12); ikaw anak na sa Dios (Mga Taga-Galacia 3:26); gipagmatarong kana tungod sa gibuhat ni Kristo didto sa krus (Mga Taga-Roma 3:21-22; 2 Mga Taga-Corinto 5:21; Mga Taga-Filipos 3:9); magpuyo kana uban Kaniya hangtod sa kahangturan (Mga Taga-Roma 8:38-39). Ang pagkatawo-pag-usab makapahimo nimo nga “usa ka bag-ong binuhat ni Kristo” uban ang usa ka permanenteng relasyon uban sa Dios (2 Mga Taga-Corinto 5:17).²⁰

Dili lang kay kana ra, magsugod pa gayud ikaw sa imong Kristohanong pagkinabuhi nga nahinloan sa imong mga sala. Maingon nato nga sa niadtong panahon sa imong pagtoo ni Jesu-Kristo, mga baynte pa ang imong edad. Sa maong gitason sa panahon ikaw nakatapok na og daghang mga sala ug

Ang pagpuno sa Balaang Espiritu, usa ka temporaryo, ug wala na'y ikatandi sa lain nga kahimtang nga maangkon lamang sa usa ka magtotoo sa panahon sa kaluwasan sulod sa Kapanahonan sa Simbahan, nagahum o nagmatutu sa kalag sa usa ka magtotoo (Juan 14:26) ug diha makita ang balaang gahum alang sa pagtuman sa Kristohanong pagkinabuhi (Mga Taga-Efeso 5:18). Kining lunsay nga kahimtang mawala ra pinaagi sa pagpakasala ug mahiuli ra kini pinaagi sa pagsugid sa atong mga sala sa Dios (1 Juan 1:9). Tan-awa ang mga pahina 22-24. Tan-awa Thieme, *Rebound and Keep Moving!* (1993), 11-13; *God the Holy Spirit vs. The Sin Nature*, 6; *Christian Integrity*, 25-26.

Ang Kapanahonan sa Simbahan nga nagsugod sa adlaw sa pagkunsad sa Espiritu Santo o ang gitawag nga Adlaw sa Pentekostes, ika kalim-an ka adlaw tapos sa Paglansang ni Kristo sa Krus (Mga Buhat 2:1) ug kini matapos sa Pagkabanhaw o Pagsakgaw sa mga magtotoo sa Kapanahonan sa Simbahan (Mga Taga-Roma 16:25; Mga Taga-Efeso 1:10; 2:1, 5, 8-9; Mga Taga-Colosas 1:25-26). Ang dispensasyon maoy usa ka panahon sa kasaysayan sa tawo nga gipahayag pinaagi sa balaan nga pagpadayag nga nagpakita sa paghubad sa plano sa Dios alang sa kaliwatan sa tawo (Mga Taga-Roma 16:25) ug mao kini ang teyolohikal nga interpretasyon alang sa balaan nga pagtan-aw sa kasaysayan (Mga Taga-Efeso 2:7). Tan-awa Thieme, *The Divine Outline of History*, 3, 63-68.

20. Thieme, *The Prodigal Son* (2001).

maayong mga binuhatan—ibutang ta mga kaliboan. Sa dihang si Kristo namatay sa krus kadtong tanang mga sala gihuwad ngadto Kaniya ug gihukman—matag usa kanila. Sa higayon nga nidawat ka ni Kristo nga imong Manluluwas, ang tanang kaliboan nga mga sala gipangpala.

Pero nagpabilin pa diha kanimo ang kinaiyang makasasala nga nagtintal nimo sa pagpakasala ug nagpahimulag kanimo gikan sa pakigfellowship sa Dios. Ikaw mahimo gihapong madasig sa pangibog. Kon ikaw makasala sa bahin dos sa plano sa Dios, gikontrolar ka sa imong kinaiyang makasasala ug kini wala kahimot-i sa Dios.

Kinahanglan imo gayong masabtan nga ang kinaiyang makasasala wala gayuy bisan unsa nga magamit ang Dios. Ang kinabuhi sa usa ka Kristohanon kinahanglan nga maglihok ubos sa pagpuno o pagkontrolar sa Balaang Espiritu, dili kay ginamhan sa kinaiyang makasasala (Mga Taga-Efeso 5:18). Kon ang tawo gigamhan sa iyahang kinaiyang makasasala pagkahuman siya maluwas, gitawag siya sa Bibliya nga ‘karnal’ nga Kristohanon. “Karnal” usa kini ka karaan nga englis nga pulong, nga matawag nato og tinuud nga *‘antik’*. Gatusan ka katuigan na ang milabay, ug kaniadto ang ‘karnal’ nagpasabot nga unodnon, ug ang “unod” gigamit usahay kini sa paghingalan sa kinaiyang makasasala. Ang karnal nga Kristohanon maoy bisan kinsa nga magtotoo—ikaw o ako—kon siya nakasala.

Sa unang higayon nga ikaw nakasala human ka naluwas siguro kini makapahikugang kanimo. Apan sa paglabay sa panahon, ang pagpakasala mahimong butang naandan. Kon ikaw nagpuyo sa imong Kristohanong pagkinabuhi nga walay pagtubo—akong pasabot nga wala ka makakat-on og mga doktrina sa Bibliya—imong giugmad ug gihapsay ang imong kinaiyang makasasala ngadto sa karnalidad. Pananglitan, imong nahibaloan ang lagda sa usa ka lokal nga simbahan—kon unsay madawat ug unsay dili madawat sa mga tawo—sa ingon niana imong makat-onan kon unsaon nimo pagtago sa

imong mga dapit sa kaluyahon. Kon ikaw magpabilin nga ignorante sa doktrina ug unsaon pud sa pagpugong sa imong kinaiyang makasasala, ikaw mahimo nang usa ka primera klase nga pagkaaron-ingnon. Karong mga panahona, ang mga Kristohanong nga nagpakaaron-ingnon makita sa bisan asang dapita ug ang mga listo nga dili-magtotoo dali ra gayud makabantayniini. Ang mga bag-ong mga magtotoo kinahanglang katudloan gayud nga ang Dios naghatag sa tanang mga pamaagi aron malikayan ang paglambo sa kinaiyang makasasala.

Pagbakwi Gikan sa Aberiya

Pinaagi sa pagkat-on ug paggamit sa mga doktrina sa Biblia hinayhinay nimong malikayan ang sigeng pagtintal sa kinaiyang makasasala diha sa imong kinabuhi. Apan ang sala dili kini malikayan nga mahitabo gayud (1 Juan 1:8, 10) ug kon ikaw nakasala, kinahanglan mahibalo ka unsaon pag-ipsot unya sa pagkontrolar sa imong kinaiyang makasasala. Ang nakamaot lang niini mao nga ang kinaiyang makasasala dili gayud matangtang. Pero ania ang maayong balita: Anaa kitay paagi sa pagkontrolar sa atong kinaiyang makasasala. Ang pagkat-on unsaon pagpalupad sa usa ka ayroplano mohatag ug maanindot nga paghulagway ug katin-awan niini.

Ang imong magtutudlo alang sa pagpalupad modala kanimo ngadto sa usa ka ayroplano ug moingon, “Kini mao ang usa ka ayroplano”—sama sa akong giingon nga, “Adunay Dios.” Siyempre, ikaw nasayod na nga kana usa ka ayroplano. Ang ayroplano dunay mga kasangkapan alang sa pagmaneho niini—ang timon sa iyang ikog gisumpay sa usa ka tul-id nga manobela nga mura og tukog nga gitaod sa salug atubangan sa piloto, adunay instrumento usab sa pagpakita sa gikusgon sa pagliko, ug adunay gasolinador. Sa dihang ikaw gipakita sa nagkalainlaing bahin sa ayroplano ang magtutudlo magpasabot niini nga nag-ingon, “Ang gamit niini mao kini . . . ug mao kana

ang gamit niana.” Sa katapusan, mosakay na ikaw sa ayroplano diin didto tudloan ka unsaon pagbakos sa imong kaugalingon, ug ikaw pagadad-on na sa panaw sa kahanginan aron sa pagpasinati sa tinuud nga paglupad.

Sa nagpadayon ang imong pagkat-on sa pagpalupad, ang una nga paagi nga kinahanglan matun-an nimo mao kon unsaon pagbakwi gikan sa aberiya. Ang pagkaabireya nagpasabot nga ang ayroplano wala magpabilin sa insaktong linihokan sa paglupad. Sa lain nga pagkasulti, ang ayroplano adunay daotan ug peligroso nga kahimtang nga mosangpot unya sa dihadiha nga katalagman. Busa, kinahanglan makakat-on ka una og unsaon sa pagbawi balik ngadto sa insaktong linihokan sa paglupad. Ngano man nga ang maestro magtudlo kanimo niini nga paagi una sa tanan? Aron malikayan nimo ang pagkabali sa imong li-og ug sa li-og usab sa imong magtutudlo.

Ang pagbakwi gikan sa pagkaaberiya mamahimong kalit ingon nga ang maestro nagtinguha nga kini magmalampuson, magaagad kini sa kahimtang sa ayroplano ug ang kabatid ug kaisug sa maestro. Daghang mga maestro nga nagtudlo sa pagpalupad ganahang moduut sa manobela paabante, padulong ngadto sa maayong pagkatiurok, ug kalit lang birahon ang manobela ug kini maghimo nga magtindog sa ikog niini samtang ikaw nga naglingkod mibati nga daw ang imong tiyan miduut na sa imong bukobuko. Dayon, “Wum!” Padulong ka na sa pagkaaberiya, makalilisang nga pagtulilik ang simod sa ayroplano nagpatihulog na paubos ug maduut ang imong likod sa imong gilingkoran. O diba hinoon ang laing paagi sa pagkaaberiya sa ayroplano mao kini nga ang maestro mokalit lang og sira sa gasolinador aron sa pagpalong sa makina, ug dihadiha wala ka nay madunggan gawas ang hagoros na lamang sa hangin. Paubos ka nang magtibugsok nga daw ang imong tiyan karon misaka sa imong ulo. Ang pagkat-on sa pagkaaberiya mahimong kulbahinam gayud!

Ang magtotoo nga nagsulay sa Kristohanong paagi sa pagkinabuhi ubos sa pagkontrolar sa kinaiyang makasasala

anaa sa pagkatibugsok. Susama kini sa pagpalupad sa usa ka ayroplano nga walay kahibalo kon unsa ang paagi sa pagbawigikan sa pagkaaberiya kini mosangpot gayud sa katalagman, nan ang magtotoo nga walay alamag kon unsaon pagkontrolar sa iyang kinaiyang makasasala nag-atubang sa katalagman. Mao kini ngano nga dili gayud nako matudlo kaninyo ang uban pang laing mga pagtulon-an hangtod nga kamo makahibalo sa 'pagbakwi gikan sa pagkaaberiya.'

Dili ka makakat-on sa pagpalupad kon anaa ka sa pagkaaberiya, sa pagkatuurok, o diha sa pagkatulilik; ikaw makakat-on sa pagpalupad kon ang ayroplano naglihok sa matarong nga paglupad. Sa plano sa Dios ikaw dili makatoon sa mga espirituhanong mga kamatuuran kon anaa ka sa pagkaaberiya, ilalum sa pagkontrolar sa imong kinaiyang makakasala. Ikaw makakat-on sa doktrina sa Bibliya, og ato kining makit-an unya, nga kini mahimo lamang sumala sa pamaagi sa Dios.

Daghan sa mga Kristohanon adunay sayup nga pagsabot nga kon ikaw nakadawat na ni Kristo, ang imong mga problema natapos na; dili ka na gayud makasala ug ikaw magmalipayon na. Sa kasamtangan, kung ang magtotoo nga wala magtoon sa pulong sa Dios mapakyas, siya makaingon nga dili gayud diay siya luwas. Siya mangatarungan nga siya nasayup gayud. Siya wala nakasabot nga sa dihang nitoo siya ni Kristo bisan pa sa sunod nga mga pagpakasala ug mga kapakyasan ang iyang kaluwasan dili na gayud mawala (Mga Taga-Roma 8:38-39).²¹ Ang mga magtotoo nga nagabalikbalik sa pagpangutana bahin sa ilang way katapusang kasigurohan nagasulay ug lainlain nga mga paagi alang sa ilang kasigurohan ug sa pagpamatuud niini, apan dili gayud kini magasulbad sa mao nga kahimtang. Unsa may gikinahanglan aron sa pagtul-id sa ilang sayup nga pagsabot mao ang doktrinal nga pahamatngon mahitungod sa

21. Thieme, *The Prodigal Son*, 31-32.

karnalidad sa mga taga-Corinto nga gisulat ni Apostol Pablo sa 1 Mga Taga-Corinto 3:1.

Ang Karnal nga mga Taga-Corinto

Ug ako, kaigsoonan, dili makasulti diha kaninyo ingon nga mga tawong espirituhanon, kondili ingon nga mga tawo diha sa unod, ingon nga mga masusu pa diha kang Kristo. (1 Mga Taga-Corinto 3:1)

Si Pablo nagahisgot dinhi ingon nga magtutudlo ngadto sa mga tinun-an ug siya nagkanayon, “Ug ako, kaigsoonan”. Ang pulong ‘kaigsoonan’ nagpasabot kini nga ang mga tawo dinhi nakahimo na sa pinakadako nga desisyon—ang desisyon sa pagtoo kang Jesu-Kristo—sa pagdawat Kaniya ingon nga Manluluwas. Ang pulong kaigsoonan nagpakita nga kini sila mga sakop na sa pamilya sa Dios. Kita nahimong mga sakop sa pamilya sa Dios pinaagi sa pagdawat kang Kristo ingon nga Manluluwas (Mga Taga-Galacia 3:26). Bisan pa niana, tungod kay ang Kasulatan nagatawag kanato nga “kaigsoonan,” wala nagpasabot nga kinahanglan nga ikaw magsuroysuroy ug magtawag sa matag tawo “brad” o “sis.” Ang pulong kaigsoonan makahuloganon gayud tungod kay kini nagpasabot man nga ang tanang mga magtotoo sakop na sa susamang pamilya.

“Ug ako, mga igsoon, dili makasulti diha kaninyo.” Ani-a si Pablo, ang pinakabantugan nga magtutudlo sa kasaysayan, ug siya dili makasulti. Ngano man? Tungod kay kining mga tawhana dili man mga espirituhanon. Dihadiha ikaw naghunahuna, “Nan, kinsa man ug unsa man ang espirituhanon?” Ikaw tingali makasulti sa imong kaugalingon, “Wala nako nabati ang pagka-espirituhanon.” Unsaon man pagbati sa pagkaespirituhanon? Kini ba madamgohon nga pagbati nga dili lalim pagabation kon ikaw tua sa mga kapanganuran? Ang pagsinati ba sa presensya sa Dios? Ang katagbawan ba gumikan sa imong


pagkamatarong? Dili gayud! Ikaw espirituhanon sa panahon nga ikaw gikontrolar sa Balaang Espiritu ug unsa man ang imong gibati wala kiniy labot. Kung ang Dios Balaang Espiritu nagkontrol sa imong pagkinabuhi, ikaw espirituhanon.

Ang pagkaespirituhanon usa ka hingpit nga kahimtang. Sa bisan unsang higayon, mahimo kang gipuno o gikontrolar sa Balaang Espiritu o gikontrolar ka sa imong kinaiyang makasasala. Ikaw mahimong espirituhanon bisan naglabad ang imong ulo; ikaw espirituhanon bisan og mibati ka og kasubo; ikaw espirituhanon bisan og maayo ang imong gibati, ikaw espirituhanon bisan og giduka ka; ikaw espirituhanon bisan og anaa kas kaabtik. Bisan unsa ang imong pagabation wala kiniy kalabutan sa imong pagkaespirituhanon. Ang pagkaespirituhanon mao ang paggahum sa Balaang Espiritu sa imong pagkinabuhi (Mga Taga-Efeso 5:18).

Ikaw kinahanglang gikontrol sa Balaang Espiritu aron makakat-on ug makagamit sa doktrina sa Bibliya ug pagtuman sa bahin dos, sama ra nga ikaw kinahanglang magpalupad sa tul-id nga paagi aron makat-on ug magamit ang mga pamaagi sa pagpalupad. Ang pinakalisod nga bahin sa pagpalupad mao ang pagpirmi diha sa tul-id nga paglupad bisan pa sa nagatabok ug hagueros nga hangin ug dautan nga panahon. Mao usab, ang pagkaespirituhanon mao ang pagpabilin sa imong pakigfellowship uban sa Dios ilalom sa bisan unsa man nga kahimtang. Dili ka makakat-on ug gamit sa mga doktrina sa Bibliya ug magpuyo subay sa Kristohanong pagkinabuhi samtang ikaw gikontrolar sa imong kinaiyang makasasala. Tungod niini, ikaw kinahanglang makakat-on gayud sa pamaagi sa pagbawi gikan sa pagkaabireya aron makontrolar ka sa Espiritu, kay ang Dios Balaang Espiritu man ang nagtudlo sa mga doktrina sa imong tawhanong espiritu ug naghatag sa gahum sa imong espirituhanong pagkinabuhi (1 Corinto 2:12-13).²²

22. Tan-awa Thieme, *Giving: Gimmick or Grace?*, 14-16; *Freedom through Military Victory* (2003), 52-53.

Ang pagkaabireya diha sa Kristohanong pagkinabuhi mao ang pagkagawas gikan sa pakigfellowship kang Ginoong Jesu-Kristo ug ngadto na sa kahintang sa karnalidad. Si Pablo nagpadayag sa iyang kaligutgot ngadto sa mga magtotoo diha sa Corinto sa dihang siya nagkanayon, “Ug ako, kaigsoonan, dili makasulti diha kaninyo ingon nga mga tawong espirituhanon, [gikontrolar sa Espiritu Santo], kondili ingon nga mga tawo sa unod [karnal].” Tungod sa ilang karnalidad, kini nga “mga masuso pa diha kang Kristo” nakahibalo ug dyutay lamang sa mga doktrina sa Bibliya ug wala gayud sila mouswag sa ilang Kristohanong paagi sa pagkinabuhi.



Tugoti ako sa paghulagway pinaagi sa duha ka mga lingin. Ang ibabaw nga lingin naghulagway sa walay katapusang

relasyon uban sa Dios; ang ubos nga lingin, temporaryo ra nga pakigfellowship uban sa Dios. Ang matag usa ka magtotoo gibutang diha sa ibabaw nga lingin uban kang Kristo sa takna sa iyang kaluwasan ug dili na siya makagawas gikan niini (Mga Salmo 37:24; Juan 10:28). Ikaw walay igong mabuhat nga makatangtang sa imong kaluwasan. Ang ubos nga lingin naghulagway sa Espiritu Santo nga mao ang naggahum sa imong kinabuhi ug kini gitawag nga “pakigfellowship” o “espirituhanon.” Sa gawas sa ubos nga lingin anaa ka sa kahimtang nga karnalidad ug ang kinaiyang makasasala maoy nagkontrolar sa imong pagkinabuhi. Ang espirituhanon nga magtotoo anaa sa sulod sa ubos nga lingin sa pakigfellowship ug ang karnal nga magtotoo anaa sa gawas sa ubos nga lingin.

Si Pablo nagkanayon, “Sa panahon nga ako makig-estorya kaninyo ug kamo anaa sa gawas sa ubos nga lingin nga mao ang fellowship kang Kristo dili kamo makasabot kanako.” Si Pablo dili makahimo sa pagpahibalik ug sulod kanila sa ubos nga lingin. Dili niya sila mapugos pabalik sulod sa lingin sa pakigfellowship. Walay bisan usa nga makahimo nga makapabalik sa iyang kaugalingon sulod sa lingin. Walay bisan usa nga makalusot pinaagi sa pagpenitensya o pagbayad og salapi aron makabalik sulod sa lingin sa pakig-fellowship. Ang pagsulod balik sa ubos nga lingin nagakinahanglan sa paagi sa pagbakwi gikan sa pagkaabireya. Ato kining tawgon nga “rebound” nga pamaagi.

Sa dili ka pa *makatoon sa mga doktrina*, imo sa nga *pagasabton ang rebound!* Si Pablo nagkanayon:

Ako mihatag kaninyo ug gatas aron mainom, dili gahi nga pagkaon; kay kamo dili pa arang makatulon niini. Sa pagkatinuod, bisan gani karon kamo dili pa makahimo niini. (1 Mga Taga-Corinto 3:2)

Si Pablo nangasaba gayud sa mga taga-Corinto. Maingon nga siya nagasulti, “Tan-awa, kamo anaa sa gawas sa

pakigfellowship. Dili pa kamo makasabot og doktrina, ug dili pa gihapon kamo makakat-on niini.” Dayon siya nagdugang: “Kay kamo mga unodnon pa man” (1 Mga Taga-Corinto 3:3).

Sa takna nga ikaw nahimugso diha sa pamilya sa Dios pinaagi sa pagtoo kang Jesu-Kristo, ang Dios Balaang Espiritu magpahiluna kanimo nganha sa pagkahiusa kang Kristo. Sa mao usab nga takna, ikaw napuno sa Balaang Espiritu, sulod sa lingin sa pakigfellowship sa kahimtang nga espirituhanon, kutob ra pud sa panahon nga makasala ka. Kung ikaw makasala, ikaw dihadhiha mahigawas! Hinumdumi, ikaw aduna pay kinaiyang makasasala. Ikaw mogawas gikan sa ubos nga lingin kung ikaw makasala, apan ikaw makabawi pa niini sa bisan unsa nga takna. Kinahanglan lang nimo mahibaloan kung unsaon pagbalik sulod gikan sa gawas sa lingin nga pakigfellowship—gikan sa pagkakarnal ngadto sa pagkaespirituhanon. Ang pagbawi nagkinahanglan sa rebound nga paagi—ang pagbakwi gikan sa pagkaabireya nga pamaagi. Rebound mao ang sumbanan alang sa pagkat-on sa mga pagtulon-an sa Bibliya ug ang yawe sa pagkinabuhi sulod sa plano sa Dios ug ang paghimo sa balaanong pagkamaayo.

Kay kamo unodnon pa gihapon. Kay samtang aduna pay kasina ug pakigbingkil diha kaninyo kamo dili ba unodnon, ug wala ba kamo magalakaw ingon nga mga tawo nga lawasnon? (1 Mga Taga-Corinto 3:3)

Si Pablo naghulagway sa usa ka klase sa sala nga gipangsaway sa Bibliya sa makadaghang higayon: kasina. Giunsa sa mga taga-Corinto paggawas sa ubos nga lingin? Kasina! Ang kasina usa ka klase sa pagpakasala sa panghunahuna nga magbunga sa usa ka sumpaysumpay nga mga sala. Basta gawas na gani sa ubos nga lingin, ang pakigbingkil magkadako gayud. Unsa ang pakigbingkil? Ang pakigbingkil mao ang pagsumpaki ug pakig-away. Sa panahon

nga ang usa ka tawo adunay kasina, siya mahimong magtuman sa iyang gibati ug mangita ug panimalos. Kanang tawhana gusto magpasakit, mangdaot, mangdaugdaug ug mohukom; kini mosangpot sa batasan nga palaaway.

Unsay mahitabo kon adunay grupo sa mga katawhan nga nalambigit sa sala? Sila nagasugod sa mga sala sa panghunahuna ug kini modayon na ngadto sa pakigbingkil. Ang pakigbingkil sukwahi gayud sa mahupayong kinaiya. Sa sulod sa lingin sa pakigfellowship, bisan kinsa makabaton sa mahupayong kinaiya. Sa gawas na sa ubos nga lingin, ang mga magtotoo magkagubot tungod sa pakigbingkil usa batok sa usa. Mao man gani nga si Pablo dili makatudlo ug doktrina ngadto sa mga Taga-Corinto. Sila adunay sala sa panghunahuna nga masinahon nga ilang gipaabot na ngadto sa “pakigbingkil ug pundok-pundok.”

Si Pablo nagpadayon: “Dili ba kamo unodnon, ug wala ba kamo magalakaw ingon nga mga tawo nga lawasnon?” (1 Mga Taga-Corinto 3:3). Unsa ang usa ka butang nga imong gihuptan nga gidala nimo sa imong Kristohanong kinabuhi? Ang imong kinaiyang makasasala. Ang matag magtotoo aduna niini! Ang gisulti nga, “nagalakaw ingon nga tawo nga lawasnon,” nagpasabot nga ikaw anaa sa gawas sa ubos nga lingin. Ang “mga tawo nga lawasnon” usa kini ka pulong paghulagway alang sa mga tawo nga wala pa makadawat kang Kristo ingon nga ilang Manluluwas. Sa laing pagkasulti, kung ikaw wala sa sulod sa lingin sa pakigfellowship, ikaw naglakaw o nagkinabuhi sama sa usa ka dili-magtotoo. Mahimo nga ang usa ka tawo matarong o dili-matarong sa iyang pagka dili-magtotoo, usa ka rilihiyoso o dili-rilihiyoso nga dili-magtotoo, usa ka menos sa pangisip o maalam nga dili-magtotoo, apan ikaw nagkinabuhi sama sa usa ka dili-magtotoo.

Ang kinaiyang makasasala imong kaaway, apan kini kabahin nimo—kini gikan sa imong pagkahimugso. Dili gayud ikaw makatangtang niining kinaiyang makasasala hangtod nga ikaw mamatay ug mosulod na sa bahin tres. Samtang ikaw ania pa

sa kalibutan karon, ang Dios magsangkap kanimo sa pagbakwi sa pagkaabireya nga mao ang rebound nga pamaagi.

Rebound, Ang Yawe sa Pagtuman sa Plano sa Dios

Kung isugid ta [hinganlan] ang atong mga sala, Siya matinumanon ug matarong [maangayon] aron sa pagpasaylo sa atong [nahibaloan] mga sala ug sa paghinlo kanato gikan sa tanang dili-pagkamatarong [sayup nga mga binuhatan]. (1 Juan 1:9)

Ang nag-una nga pulong “kung” nagpaila sa unsay gitawag nga ikatulong klase sa pasikaranan sa orihinal nga pinulongang Griyego nga, ang ikatulong pasikaranan nagpasabot nga tingali imong buhaton ug tingali dili nimo buhaton ang pagsugid sa imong mga sala. Gamit ang kabubut-on diha sa imong kalag, ikaw magpili alang sa imong kaugalingon unsay imong pagabuhaton. Ikaw makahimo sa positibo ug negatibong desisyon. Sa panahon nga mobuhat ka sa unsay gipamulong diha sa 1 Juan 1:9, ikaw naggamit sa imong positibo nga kabubut-on. Ang pulong “kita” nagpasabot sa tanang magtotoo diha kang Jesu-Kristo; matag magtotoo adunay mga kapilian.

Ang sunod nga pulong “isugid,” sa yano nga kahulugan niini mao ang “pagsulti, paghingalan, pag-angkon, o pag-ila.” Sa unang panahon ang mga Griyego naggamit sa mga pulong nga nagpasabot “paghisgut sa usa ka kaso.” Ang kaso nga gipaghisgutan diha sa 1 Juan 1:9 mao ang krus. “Ang atong mga sala” gihukman na sa ibabaw sa krus ug kita sa yano makabungat o makahingalan niining mga sala sa tago ngadto sa Dios nga Amahan. Ang pagsugid o paghingalan sa imong mga sala wala magkinahanglan ug pinitensya. Ang pagsugid wala gani nagkinahanglan nga ikaw mobati ug kaguol sa sala o mangaliyupo sa Dios alang sa kapasayloan. Hinganli lamang

ang sala diha sa Dios, sa tinago ug dili kang bisan kinsa.

Ngano nga sa Dios lang? Tungod kay ang matag magtotoo usa man ka pari ug kinahanglang modangop diretso sa Dios. Ingon nga magtotoo nga pari ikaw may katungod sa imong praybasiya sa pagpuyo sa imong kinabuhi ngadto ug alang sa Dios (1 Pedro 2:9).²³ Ingon nga pari ikaw manubag ngadto sa Dios sa imong mga sala, ug dili sa laing uban pa nga tawo. Si David nakabuhat ug pagpanapaw, siya nakapatay, siya nakabuhat sa tanang klase sa mga sala. Apan sa siya nakarebound na, siya nagkanayon, “Batok Kanim, Kanim lamang, ako nakasala ug nagbuhat sa unsay daotan diha sa Imong mga panan-aw” (Mga Salmo 51:4). Ang sala batok sa Dios, usa kini ka salaud batok sa kinaiya sa Dios. Siguro adunay uban nga mga tawo nahilambigit sa imong pagpakasala, apan ang magtotoong-pari magsugid niini diretso ngadto sa Dios nga Amahan.

“Kung isugid ta ang atong mga sala, Siya [Dios] matinumanon.” Ang pulong “matinumanon” nagpasabot nga ang Dios nagtubag sa susamang paagi sa kanunay. Ang Dios sa kanunay nagtubag diha sa grasya ug nagpasaylo kanato. Siya dili gayud mabalhinon. Dili gayud kini mahitabo! Ang pagkamatinumanon maoy usa ka way katapusang kinaiya sa Dios. Siya makanunayon gayud.

“Siya [Dios] matinumanon ug matarong [maangayon] aron sa pagpasaylo sa atong mga sala.” Ang Dios matinumanon ug matarong sa pagpasaylo nato sa atong mga sala tungod kay ang atong mga sala gibubo na o gibutang na ngadto

23. Sa Kapanahonan sa Simbahan, ang matag magtotoo sakop sa Harianong Pamilya sa Dios nga napaghiusa kang Ginoong Jesu-Kristo nga mao ang labawng pari (Mga Hebreohanon 6:17, 20) ug nakig-ambit sa Iyang pagkapari (Mga Hebreohanon 7:1, 3). Tungod niini, ang matag usa ka magtotoo sa Kapanahonan sa Simbahan mibarog sa Iyang kaugalingon sa atubangan sa Dios. Ang harianong pagkapari mao ang dili-makita nga bahin sa Kristohanong pagkinabuhi nga nagalangkob sa pag-angkon sa mga sala sa sekreto nga paagi ngadto sa Dios (1 Juan 1:9), pag-ampo (Mga Hebreohanon 4:16), pagkat-on ug paggamit sa doktrina (2 Pedro 3:18), ug ang pag-ambit sa lamesa sa Dios (1 Mga Taga-Corinto 11:23, 26) Tan-awa Thieme, *Christian Integrity*, 101-04.

kang Kristo didto ibabaw sa krus (1 Pedro 2:24).²⁴ Ang Dios Amahan naghukom na sa matag sala niadtong higayona ug walay magtotoo nga pagahukman pag-usab tungod sa iyang mga sala. Tungod sa buhat ni Kristo sa ibabaw sa krus, ang pagkamatarong ug hustisya sa Dios nga Amahan nahatagan na og katagbawan ug ang Dios gawasnon na nga mopasaylo sa atong mga sala ug “sa paghinlo kanato gikan sa tanang dili-pagkamatarong.”

Ang “pasaylo” nagpasabot nga “kalimtan ug pagpapas.” Ang Dios dili lang mopasaylo sa gisugid nga sala nga atong gitawag nga mga nahibaloan nga sala, apan sa samang higayon Siya mopasaylo sa tanang mga wala mahibalo-i nga mga sala ug magahinlo kanato sa tanang “dili-pagkamatarong.” Ang dili-pagkamatarong nagpasabot kini sa tanang mga wala mahibalo-i nga mga sala ug sa mga sala nga nakalimtan na.

Mao kini ang imong pagbakwi sa pagkaabireya; ang rebound nga paagi.²⁵ Ikaw kinahanglan nga sa kanunay magbaton ka og hamubong mga tulobagon diha sa Dios. Sa panahon nga makasala ka, gamita dayon ang 1 Juan 1:9 aron nga ikaw mahibalik dayon sa pakigfellowship ubos sa pagkontrol sa Balaang Espiritu (1 Mga Taga-Corinto 3:16; 6:19).

Sa magtotoo nga mapakyas sa pagpahimulos sa rebound nga pamaagi, siya anaa sa kahimtang sa nagpadayon nga karnalidad. Bisan siya karnal, dili gayud mawala ang iyang kaluwasan. Ang Dios nahigugma gihapon kaniya sama ra sa Iyang paghigugma kaniya sa dihang siya anaa pa sa sulod sa lingin nga pakigfellowship tungod kay siya sakop gihapon sa pamilya sa Dios. Apan dinhi nga punto siya makadawat gayud og balaang pagpanton; siya pagalatuson.²⁶

24. Ang impyutasyon maoy usa ka buhat sa hustisya sa Dios diin ang paghukom o panalangin gihatag, gipasulod o gipahamtang ngadto sa usa ka tawo. Tan-awa Thieme, *The Integrity of God*.

25. Thieme, *Rebound and Keep Moving!*

26. Thieme, *The Prodigal Son*, 17.

“ALANG KANILA NGA GIHIGUGMA SA DIOS SIYA NAGAPANTON, UG NAGALATOS SA MATAG ANAK NGA IYANG GIDAWAT.” Kay kini tungod sa pagpanton nga kamo makalahutay; ang Dios nag-ila kaninyo isip mga anak; kay kinsa bang anak nga diha sa *iyang* amahan dili pagapantonon.” (Mga Hebreohanon 12:6-7)

Unsaon man niya pagbakwi? Pinaagi sa paggamit sa 1 Juan 1:9—ang pamaagi sa pagbakwi gikan sa pagkaabireya!

Ang 1 Juan 1:9 dili pagtugot sa pagpakasala, kondili pagtugot sa pagpangalagad. Alang sa usa ka magtotoo, kadto lamang mga binuhatan nga gihimo ubos sa gahum sa Balaang Espiritu ang makapasar ingon nga balaang pagkamaayo ug makadawat og pag-ila gikan sa Dios ingon nga tinuuray nga Kristohanong pagpangalagad didto sa Lingkoran sa Paghukom ni Kristo.²⁷ Ang rebound nagtugot sa magtotoo sa paglihok ubos sa gahum sa Balaang Espiritu—ang pagpapuno sa Espiritu (Mga Taga-Efeso 5:18), paglakaw pinaagi sa Espiritu (Mga Taga-Galacia 5:16-18). *Ang rebound maoy usa ka balaanong hiyas nga magahimo paglihok sa Kristohanong paagi sa pagkinabuhi.* Kini usa ka grasya sa Dios pagsangkap alang sa pagpugong sa kinaiyang makasasala ug alang sa pagpadayon sa pag-uswag sa Iyang plano diha sa bahin dos (2 Pedro 1:3, 8).

Grasya Mao ang Plano sa Dios

Ang bahin dos sa plano sa Dios nagsangkap sa matag magtotoo sa paagi kon unsaon ang pagkinabuhing Kristohanon ug ang paghimaya sa Dios sulod sa panahon. Apan gawas kon

27. Tan-awa sa pahina 41.

kita nakasabot kinsa ang Dios, kinsa kita, ug unsa ang Iyang nabuhat alang kanato, ang Iyang plano nagpabilin nga dili klaro. Walay bisan usa kanato nga makaangkon o angayan sa gihatag sa Dios kanato—ang tanan nag-agad diha sa Iyang grasya. Sa pagkatinuud, ang sama og kahulogan sa plano sa Dios mao ang grasya.

Ang unang lakang sa paghimaya sa Dios sulod sa panahon mao ang paggamit kanunay sa grasya nga pamaagi sa rebound. Apan ang grasya sa Dios wala matapos sa pagpakatawo-pag-usab ug sa rebound. Ang pagbansaybansay sa rebound nga pamaagi mao lamang ang sinugdanan. Ang Dios libreng naghatag sa matag magtotoo sa Kapanahonan sa Simbahan og mga kaayuhan ug mga kahigayunan nga makapakugang sa atong imahinasyon (Mga Taga-Efeso 1:3, 18; 3:20).²⁸ Ang pagkat-on sa paggamit sa mga pagsangkap gikan sa grasya sa Dios kinahanglang mao ang tumong ug tuyo sa matag magtotoo sa bahin dos. Ang atong Kristohanong mga pagkinabuhi dili makauswag ngadto sa pagkahamtong kung wala ang kaalam sa mga doktrina sa Bibliya ingon nga atong gabayan. Ang doktrina sa Bibliya mao lamang ang makapadayag sa pagkabililhon sa Diosnong plano alang kanato. Samtang kita magauswag gikan sa “pagka-masuso pa diha kang Kristo” ngadto na sa espirituhanong pagkahamtong, diha lamang kita magsugod sa husto nga pagsabot gayud ug makabuhat sa plano sa Dios sulod sa bahin dos, kay ang Iyang plano nagsugo kanato sa:

Pagtubo diha sa grasya ug kahibalo sa atong Ginoo ug Manluluwas nga si Kristo Jesus. Kaniya *ang* himaya, susama karon ug sa adlaw sa eternidad.
(2 Pedro 3:18)

28. Ang Kapanahonan sa Simbahan mao ang panahon nga nagsugod sa Pentekostes (Mga Buhat 1:8) hangtod sa Pagsakgaw sa Simbahan. Tan-awa Thieme, *The Divine Outline of History*, 64-66; 79-139.

BAHIN TRES: ANG MAGTOTOO SA ETERNIDAD

Bahin tres, eternidad, kini gipasalig nga matuman ngadto sa matag magtotoo (1 Pedro 1:4-5). Sa panahon nga ikaw mobiya na gikan niini nga kinabuhi, ikaw “nawong-sa-nawong uban sa Dios” hangtud sa kahangturan (2 Mga Taga-Corinto 5:8). Ikaw makadawat ug binanhaw nga lawas sa panahon sa Pagsakgaw, usa ka lawas sama sa binanhawng Kristo. Ang binanhaw nga lawas wala nay kinaiyang makasasala (1 Mga Taga-Corinto 15:35-45) ug hangtud sa kahangturan kini gawasnon na gikan sa pagkaulipon ug pagkadili hingpit diha sulod sa bahin dos. Ang Bibliya naghulagway sa bahin tres sa ingon niini nga mga pulong:

“Ug Siya magpahid sa matag luha gikan sa ilang mga mata; Ug wala na *gayuy* pagkamatay; wala na *gayuy* pagbangutan, o paghilak, o kasakit, ang nahaunang [daan] mga butang nilabay na.” (Pinadayag 21:4)

Dunay pipila lamang ka mga paghulagway sa langit nga anaa sa Bibliya. Bisan pa niana, gikan sa mga gipadayag atong nahibaloan nga ang Iyang plano alang sa atong walay katapusan nga kaugmaon hataas ug labaw pa sa makab-ot sa atong mga gipaabot. Ang atong mga langitnong puloy-anan gihulagway nga mga “mansiyon” (KJV) sa Juan 14:2. Ang bag-o nga Herusalem, nga manaog “gikan sa kalangitan” (Pinadayag 21:2), gihulagway ingon nga siyudad nga lunsayng bulawan nga may kadalanan nga bulawan, mga pader nga gikan sa klase-klaseng mga batong hamili, ug mga ganghaan gikan sa mga perlas (Pinadayag 21:16-27).

Dugang pa niini, ang tanan nga mga magtotoo sa Kapanahonan sa Simbahan pagasusihon didto sa Lingkoranan

sa Paghukom ni Kristo, aron kita kahatagan og ganti sumala sa atong mga “binuhatan” (2 Mga Taga-Corinto 5:10). Ang atong mga ganti gitawag nga “mga korona.” Kining mao nga mga korona nindot kaayo sud-ungon ug walay katapusang pagpahinumdom sa atong espirituhanong pagtubo ug pagkamatimuman sa pagtuman sa plano sa Dios sa bahin dos (1 Mga Taga-Corinto 9:24-27; 2 Timoteo 4:7-8; Santiago 1:12; 1 Pedro 5:4; Pinadayag 2:10, 28; 22:16).

“Kay walay tawo nga makahimo sa pagtukod ug patukuranan gawas lamang sa natukod na, nga mao si Jesu-Kristo. Karon, kung bisan kinsa nga magtukod ibabaw sa patukuranan nga bulawan, plata, ug mga batong hamili [balaanong maayong binuhatan], kahoy, dagami, kogon [tawhanong maayong binuhatan] matag usa nga binuhatan mahimong dayag; kay ang adlaw [Lingkoranan sa Paghukom ni Kristo] magpakita niini, tungod kay kini ipadayagmansakalayo[tawhanong pagkamatarong mga ut-ot, langitnong pagkamatarong magpabilin]; ug ang kalayo mismo magsulay sa unsa man ang matang sa matag usa ka binuhatan. (1 Mga Taga-Corinto 3:11-13)

Ang Lingkoranan sa Paghukom ni Kristo mahitabo sa langit tapos sa Pagsakgaw sa Simbahan. Ang sala dili na hisgutanan sa Lingkoranan sa Paghukom ni Kristo, tungod kay ang tanang mga sala gihukman naman ibabaw sa krus. Hinuon, ikaw pagahukman kon giunsa nimo pagpuyo sa Kristohanon nimong kinabuhi ug kon ang imong maayong mga binuhatan makapasar ba ingon nga balaanong maayong buhat.

Kung ikaw nagpuyo sa imong kinabuhi karon sa bahin dos nga gawas sa ubos nga lingin sa kahimtang nga karnalidad, tanan nimo nga maayong buhat susama lamang sa “kahoy, dagami ug kogon.” Ikaw ba nahibalo ingon nga usa ka magtotoo diha

kang Kristo nga ikaw magkinabuhi na uban sa Dios hangtod sa kahangturan ug nga Siya *dili* makatugot nga adunay bisan usa ka tawhanong pagkamatarong nga buhat makasulod sa langit? Ang mga katawhan mahimong magpasidungog sa imong mga maayong binuhatan, apan ang Dios dili gayud magpasidungog sa bisan unsang tawhanong kamaayo. Tanan nimong mga tawhanong kamaayo pagaut-uton sa kalayo, apan Siya dili magasunog kanimo! Dili ka usab makadawat sa bisan unsa nga mga ganti.

Apan, kon ikaw magpabilin sa imong espirituhanong pagkinabuhi sulod sa ubos nga lingin sa bahin dos ug mag-uswag ngadto sa espirituhanong pagkahamtong, ang imo nga mga bunga mao ang “bulawan, plata, ug mga batong hamili.” Ang imong Kristohanong pangalagad makapasar ingon nga balaanong pagkamaayo ug dili maut-ot sa kalayo. Tungod kay ikaw nagsunod man sa bahin dos sa plano sa Dios, ikaw makadawat sa imong way katapusang mga ganti.

HUMAN SA KALUWASAN, UNSA?

Unsay plano sa Dios alang kanimo tapos sa imong kaugalingong pagtoo diha kang Kristo? Aron sa paghimaya sa Dios sa pagkakaran—aron matuman ang kalinaw, kalipay, ug katagbawan nga nagagikan lamang sa pagkat-on sa mga doktrina gikan sa doktrina sa Bibliya ug pag-uswag ngadto na sa espirituhanong pagkahamtong (Mga Taga-Roma 12:2). Pinaagi lamang sa pagkat-on sa mga doktrina sa Bibliya nga ang hingpit nga kamatuuran gikan sa Pulong sa Dios mahimong sukdanan sa imong tanlag, pangisip, ug tinubdan sa imong mga panghunahuna.

Ang doktrina gikan sa Bibliya mao ang hunahuna ni Kristo. Sa panahon nga ikaw makahibalo ug kinsa ug unsa si Kristo, ikaw magsugod na sa pag-ambit sa Iyang panghunahuna (1 Mga Taga-Corinto 2:16). Ang Dios nagmando kanimo sa

paghunahuna sa balaanong panglantaw aron nga ang Iyang katuyuan pinaagi sa grasya mamahimong matuman diha sa imong kinabuhi.

Ang Dios nagpabilin kanimo nga buhi human sa kaluwasan aron nga ikaw makatuman sa imong kaugalingong padulngan— nga mahimo kang usa ka hamtong nga magtotoo aron sa pagpadayag sa himaya sa Dios sa karon man o sa wala nay katapusan. Diha lamang sa pagkab-ot nimo sa pagkahamtong sa espirituhanong pagkinabuhi nga ikaw sa makanunayon naghimaya sa Dios pinaagi sa pagdawat sa kinatas-an ug kinanindotan nga Iyang giandam alang kanimo (Mga Taga-Efeso 1:3-6). Ang kalidad ug gibug-aton sa imong kinabuhi dinhi sa yuta ug ang imong mga ganti sa langit nag-agad sa imong binuhatan dinhi sa bahin dos.

Ikaw magauswag espirituhanon pinaagi sa makanunayong pagkat-on, paghunahuna, ug paggamit sa mga doktrina sa Bibliya. Ang imong makanunayong espirituhanong pagtubo gikan sa mga doktrina sa Bibliya nga anaa na sulud sa imong kalag maoy nagpalapad sa imong katakus alang sa pagkinabuhi, sa paghigugma, sa Kristohanong pagpangalagad, sa mga panalangin, sa kalipay.

“Kay ako nakat-on nga makontento sa bisan unsang kahimtang sa pagkinabuhi. Ako nakahibalo unsaon sa pagkinabuhi sa kakabus, ug ako usab nasayod unsaon pagkinabuhi diha sa kaharuhay; sa bisan unsa ug sa tanang mga kahimtang ako nakakat-on sa sekreto sa kabusog ug sa kagutom, susama ang pagkaadunay kadagaya ug kawad-on. Ako makahimo sa tanang mga butang pinaagi Kaniya nga naghatag ug kusog nganhi kanako. (Mga Taga-Filipos 4:11b-13).

Pakapin sa Basahon

MGA KATLUAN UG SIYAM KA MGA DILI MAPAPAS NGA ABSOLUTO UG ANG USA KA MAPAPAS NGA ABSOLUTO

Gitigom ni Lewis Sperry Chafer
Gibag-o ni R. B. Thieme, Jr.

MGA DILI MAPAPAS NGA ABSOLUTO

- I. Ang magtotoo nagpuyo diha sa walay katapusang plano sa Dios ug makig-ambit sa padulngan ni Kristo. Siya:
 - A. Nahibaloan na (Mga Buhat 2:23; Mga Taga-Roma 8:29; 1 Pedro 1:2).
 - B. Pinili (Mga Taga-Roma 8:33; Mga Taga-Colosas 3:12; 1 Mga Taga-Tesalonica 1:4; Titus 1:1, 1 Pedro 1:2).
 - C. Gipahilunang-kapalaran (Mga Taga-Roma 8:29-30; Mga Taga-Efeso 1:5, 11).
 - D. Gipili (Mateo 22:14; 1 Pedro 2:4).
 - E. Tinawag (1 Mga Taga-Tesalonica 5:24).

- II. Ang magtotoo gipasig-uli (pagtangtang sa babag tali sa tawo ug sa Dios):²⁹
 - A. Pinaagi sa Dios (2 Mga Taga-Corinto 5:18-19; Mga Taga-Colosas 1:20).
 - B. Ngadto sa Dios (Mga Taga-Roma 5:10; 2 Mga Taga-Corinto 5:20; Mga Taga-Efeso 2:14-17).
- III. Ang magtotoo natubos, nalukat gikan sa merkado sa mga ulipon sa sala³⁰ (Mga Taga-Roma 3:24; Mga Taga-Colosas 1:14; 1 Pedro 1:18).
- IV. Ang pagkahinukman na sa magtotoo, o walay katapusang paghukom gitangtang na (Juan 3:18; 5:24; Mga Taga-Roma 8:1).
- V. Ang mapulihon nga espirituhanong kamatayon ni Kristo didto sa krus ang gibayad sa silot sa tanang mga sala (Mga Taga-Roma 4:25; Mga Taga-Efeso 1:7; 1 Pedro 2:24).
- VI. Ang matag magtotoo makadawat sa pagpasig-uli para sa mga sala; ang Dios Amahan natagbaw sa gibuhay sa Iyang Anak (Mga Taga-Roma 3:25-26; 1 Juan 2:2; 4:10).
- VII. Ang magtotoo patay na sa daang kinabuhi, sa kinaiyang makasasala, apan buhi diha sa Dios, retroactive posisyonal nga kamatuuran. Siya:
 - A. Gilansang uban kang Kristo (Mga Taga-Roma 6:6; Mga Taga-Galacia 2:20).
 - B. Namatay uban kang Kristo (Mga Taga-Roma 6:8; Mga Taga-Colosas 3:3; 1 Pedro 2:24).
 - C. Gilubong uban kang Kristo (Mga Taga-Roma 6:4; Mga Taga-Colosas 2:12).
 - D. Nabanhaw uban kang Kristo, ang kasamtangang posisyonal nga kamatuuran (Mga Taga-Roma 6:4; 7:4; Mga Taga-Colosas 2:12; 3:1).

29. Thieme, *The Barrier*.

30. Thieme, *Slave Market of Sin*.

- VIII. Ang magtotoo gawasnon na gikan sa kasugoan ni Moses. Siya:
- A. Patay ngadto sa kasugoan (Mga Taga-Roma 7:4).
 - B. Giiway (Mga Taga-Roma 6:14; 7:6; 2 Mga Taga-Corinto 3:6-11; Mga Taga-Galacia 3:25).
- IX. Ang magtotoo natawo-pag-usab (Juan 13:10; 1 Mga Taga-Corinto 6:11; Titus 3:5). Ang magtotoo:
- A. Natawo pag-usab (Juan 3:7; 1 Pedro 1:23).
 - B. Usa ka anak sa Dios (Mga Taga-Roma 8:16; Mga Taga-Galacia 3:26).
 - C. Usa ka anak nga lalaki sa Dios (Juan 1:12; 2 Mga Taga-Corinto 6:18; 1 Juan 3:2).
 - D. Usa ka bag-ong binuhat (2 Mga Taga-Corinto 5:17; Mga Taga-Galacia 6:15; Mga Taga-Efeso 2:10).
- X. Ang magtotoo gisagup sa Dios, gihimong kamagulangang anak nga lalaki tungod sa posisyonal nga kamatuuran (Mga Taga-Roma 8:15, 23 sa pagkabanhaw; Mga Taga-Efeso 1:5).
- XI. Ang magtotoo gihimong madawat na sa Dios (Mga Taga-Efeso 1:6; 1 Pedro 2:5). Ang magtotoo:
- A. Gihimo nga matarong pinaagi sa impyutasyon (Mga Taga-Roma 3:22; 1 Mga Taga-Corinto 1:30; 2 Mga Taga-Corinto 5:21; Mga Taga-Filipos 3:9).
 - B. Posisyonal nga gibalaan (1 Mga Taga-Corinto 1:30; 6:11).
 - C. Gihingpit sa kahangturan (Mga Hebreohanon 10:14).
 - D. Gihimong takus para sa panulundon (Mga Taga-Colosas 1:12).
- XII. Ang magtotoo gimatarong, gideklarar nga matarong (Mga Taga-Roma 3:24; 5:1, 9; 8:30; 1 Mga Taga-Corinto 6:11; Titus 3:7).

- XIII. Ang magtotoo makadawat sa talagsaong pagkamapuslanon sa balaanong gahum (2 Pedro 1:3)
- XIV. Ang magtotoo gipasaligan sa langitnong pagkalumolupyo pinasikad sa pagpasig-uli (Lucas 10:20; Mga Taga-Efeso 2:14-19; Mga Taga-Filipos 3:20).
- XV. Ang magtotoo giluwat gikan sa gingharian ni Satanas (Mga Taga-Colosas 1:13a; 2:15).
- XVI. Ang magtotoo gibalhin na ngadto sa gingharian sa Dios (Mga Taga-Colosas 1:13b).
- XVII. Ang magtotoo anaa na karon sa lig-ong patukuranan (1 Mga Taga-Corinto 3:11; 10:4; Mga Taga-Efeso 2:20).
- XVIII. Ang matag magtotoo usa ka gasa sa Dios Amahan ngadto kang Kristo (Juann 10:29; 17:2, 6, 9, 11-12, 24).
- XIX. Ang magtotoo posisyonal nga giluwat gikan sa gahum sa kinaiyang makasasala (Mga Taga-Roma 8:2; Mga Taga-Filipos 3:3; Mga Taga-Colosas 2:11).
- XX. Ang matag magtotoo gitudlo nga usa ka pari ngadto sa Dios. Kita:
 - A. Usa ka balaan nga pari (1 Pedro 2:5, 9).
 - B. Usa ka harianong pari (1 Pedro 2:9; Pinadayag 1:6).
- XXI. Ang magtotoo makadawat sa walay katapusan nga kasiguroan (Juan 10:28-29; Mga Taga-Roma 8:32, 38-39; Mga Taga-Galacia 3:26; 2 Timoteo 2:13).
- XXII. Ang magtotoo gitagaan sa katungod nga makaduul sa Dios (Mga Taga-Roma 5:2; Mga Taga-Efeso 2:18; Mga Hebreohanon 4:16; 10:19-20).
- XXIII. Ang matag magtotoo anaa sa “pinakadaghan” nga grasyahanong pag-atiman sa Dios (Mga Taga-Roma 5:9-10). Kita:
 - A. Mga tumong sa Iyang gugma (Mga Taga-Efeso 2:4; 5:2).

- B. Mga tumong sa Iyang grasya.
 - 1. Para sa kaluwasan (Mga Taga-Efeso 2:8-9).
 - 2. Para sa pagbantay (Mga Taga-Roma 5:2; 1 Pedro 1:5).
 - 3. Para sa pag-alagad (Juan 17:18; Mga Taga-Efeso 4:7).
 - 4. Para sa pagpanudlo (Titus 2:12).
- C. Mga tumong sa Iyang gahum (Mga Taga-Efeso 1:19; Mga Taga-Filipos 2:13).
- D. Mga tumong sa Iyang pagkamatinumanon (Mga Taga-Filipos 1:6; Mga Hebreohanon 13:5b).
- E. Mga tumong sa Iyang kalinaw (Juan 14:27).
- F. Mga tumong sa Iyang pagdasig (2 Mga Taga-Tesalonica 2:16).
- G. Mga tumong sa Iyang pag-ampo (Mga Taga-Roma 8:34; Mga Hebreohanon 7:25; 9:24).

XXIV. Ang magtotoo mao ang tigdawat sa panulondon ingon nga manununod sa Dios ug masigkamanununod ni Kristo (Mga Taga-Roma 8:17; Mga Taga-Efeso 1:14,18; Mga Taga-Colosas 3:24; Mga Hebreohanon 9:15; 1 Pedro 1:4).

XXV. Ang matag magtotoo adunay bag-ong posisyon diha ni Kristo (Mga Taga-Efeso 2:6). Kita:

- A. Mga kauban ni Kristo sa kinabuhi (Mga Taga-Colosas 3:4).
- B. Mga kauban ni Kristo sa pagpangalagad (1 Mga Taga-Corinto 1:9).
 - 1. Mga magbubuhat kauban sa Dios (1 Mga Taga-Corinto 3:9; 2 Mga Taga-Corinto 6:1).
 - 2. Mga alagad sa Bag-ong Kasabutan (2 Mga Taga-Corinto 3:6).
 - 3. Mga embahador (2 Mga Taga-Corinto 5:20).
 - 4. Buhi nga mga sinulat (2 Mga Taga-Corinto 3:3).
 - 5. Mga alagad sa Dios (2 Mga Taga-Corinto 6:4).

- XXVI. Ang mga magtotoo ang mga tigdawat sa kinabuhing dayon (Juan 3:15; 10:28; 20:31; 1 Juan 5:11-12).
- XXVII. Ang magtotoo gibuhat nga usa ka bag-ong espirituhanong kaliwat (2 Mga Taga-Corinto 5:17).
- XXVIII. Ang magtotoo usa ka kahayag diha sa Ginoo, kabahin sa anghelanong away³¹ (Mga Taga-Efeso 5:8; 1 Mga Taga-Tesalonica 5:4-5).
- XXIX. Ang magtotoo nahiusa diha sa Amahan, Anak ug sa Balaang Espiritu. Kita:
- A. Diha sa Dios (1 Mga Taga-Tesalonica 1:1; cf., “Dios anaa kaninyo,” Mga Taga-Efeso 4:6);
 - B. Diha ni Kristo (Juan 14:20; cf., “Si Kristo anaa kaninyo,” Mga Taga-Colosas 1:27);
 - 1. Usa ka myembro sa Iyang Lawas (1 Mga Taga-Corinto 12:13).
 - 2. Usa ka sanga sa Paras (Juan 15:5).
 - 3. Usa ka bato sa Dakung Balay (Mga Taga-Efeso 2:21-22; 1 Pedro 2:5).
 - 4. Usa ka karnero sa usa ka Panon (Juan 10:27-29).
 - 5. Kabahin sa Iyang Pangasaw-onon (Mga Taga-Efeso 5:25-27; Pinadayag 19:6-8; 21:9).
 - 6. Usa ka pari sa gingharian sa mga pari (1 Pedro 2:9).
 - C. Diha sa Balaang Espiritu (Mga Taga-Roma 8:9; “ang Espiritu anaa kaninyo”).
- XXX. Ang matag magtotoo ang tigdawat sa mga ministeryo sa Balaang Espiritu. Siya:
- A. Natawo sa Espiritu (Juan 3:5-8).
 - B. Nabawtismohan diha sa Espiritu (Mga Buhat 1:5; 1 Mga Taga-Corinto 12:13).

31. Thieme, *Anti-Semitism* (2003), 10-12, 87-91, 93-95, 101-04.

- C. Gipuy-an sa Espiritu (Juan 7:39; Mga Taga-Roma 5:5; 8:9; 1 Mga Taga-Corinto 3:16; 6:19; Mga Taga-Galacia 4:6; 1 Juan 3:24).
- D. Giselyohan sa Espiritu (2 Mga Taga-Corinto 1:22; Mga Taga-Efeso 4:30).
- E. Gihatagan sa espirituhanong mga gasa (1 Mga Taga-Corinto 12:11, 27-31; 13:1-2).
- XXXI. Ang magtotoo gipaghimaya (Mga Taga-Roma 8:30).
- XXXII. Ang magtotoo nahingpit diha kang Kristo (Mga Taga-Colosas 2:10).
- XXXIII. Ang magtotoo nanag-iya sa matag espirituhanong panalangin nga gihatag niadtong way katapusang niaging panahon (Mga Taga-Efeso 1:3).
- XXXIV. Ang magtotoo makadawat sa tawhanong espiritu kauban sa Balaang Espiritu (Mga Taga-Roma 8:16; 1 Mga Taga-Corinto 2:12; 2 Mga Taga-Corinto 7:13; 1 Mga Taga-Tesalonica 5:23).
- XXXV. Ang mga sala ug mga kalapasan sa magtotoo giwagtang na³² (Isaias 43:25; 44:22).
- XXXVI. Ang magtotoo makabaton sa mapuslanong grasya (Mga Taga-Efeso 1:13).
- XXXVII. Ang magtotoo gipasaligan sa binanhaw nga lawas sa kahangturan (1 Mga Taga-Corinto 15:40-54).
- XXXVIII. Ang magtotoo ang tigpanunod sa walay katapusan nga panghimayad (2 Mga Taga-Corinto 5:14-15, 19; 1 Timoteo 2:6; 4:10; Titus 2:11; Mga Hebreohanon 2:9; 2 Pedro 2:1; 1 Juan 2:2).
- XXXIX. Ang magtotoo adunay patas nga pribilihiyo ug patas nga oportunidad diha sa pagkapinili ug pagkalinain (Mga Taga-Roma 12:3; Mga Taga-Efeso 3:16-19).

32. Thieme, *Reversionism*.

USA KA MAPAPAS NGA ABSOLUTO

- XL. Ang magtotoo napuno sa Balaang Espiritu sa panahon sa kaluwasan (Mga Taga-Galacia 3:3). Ang pagpuno sa Espiritu Santo nga madawat sa panahon sa kaluwasan mapapas ra kini kung ang magtotoo makasala. Ang pagpuno sa Balaang Espiritu mahibalik ra kini kung ang magtotoo mosugid sa iyang mga sala ngadto sa Dios nga Amahan pinaagi sa rebound.

Timan-anan sa Balaang Kasulatan

KARAANG KASULATAN

EXODO		ISAIAS	
20:13-15	14	30:18	6
20:17	14	43:25	50
		44:22	50
DEUTERONOMIO		58:7	16
15:11	17	58:10	16
		64:6	6,17
MGA SALMO			
14:1	2		
37:24	32	EZEQUIEL	
51:4	36	18:7-8	16
53:1-2	2	18:16-17	16

BAG-ONG KASULATAN

MATEO		14:20	49
1:18	11	14:26	24
22:14	44	14:27	48
26:11	17	15:5	49
		17:2	47
MARCOS		17:6	47
14:7	17	17:9	47
		17:11-12	47
LUCAS		17:18	48
10:20	47	17:24	47
		20:31	49
JUAN			
1:12	7,24,46	MGA BUHAT	
3:3-8	24	1:5	49
3:5-8	49	1:8	39
3:6	24	2:1	24
3:7	24,46	2:23	44
3:15	49	4:12	7
3:16	7	10:34-35	21
3:18	45	16:31	7
3:36	7		
5:24	45	MGA TAGA-ROMA	
7:39	49	3:12	6
8:12	5	3:21-22	24
10:27-29	49	3:22	46
10:28	32,49	3:23	6
10:28-29	47	3:24	45,46
10:29	47	3:25-26	45
12:8	17	4:25	45
13:10	46	5:1	46
14:2	40	5:2	47,48

5:5.....	50	13:9.....	14
5:9.....	46	13:13.....	15
5:9-10	47	16:25.....	24
5:10.....	45		
5:12.....	6,10,11	1 MGA TAGA-CORINTO	
6:4.....	45	1:9.....	48
6:6.....	11,45	1:30.....	46
6:8.....	45	2:12.....	50
6:14.....	46	2:12-13	30
6:23.....	6	2:16.....	23,42
7:4.....	45,46	3:1.....	29
7:5.....	11	3:2.....	32
7:6.....	46	3:3.....	31,33,34
7:8-20	11	3:9.....	48
7:14-25	23	3:11.....	47
7:18.....	11	3:11-13.....	41
8:1.....	45	3:11-15.....	17
8:2.....	47	3:16.....	23,37,50
8:3-4	11	6:11.....	46
8:9.....	49,50	6:19.....	23,37,50
8:10-11.....	23	9:24-27	41
8:15.....	46	10:4.....	47
8:16.....	46,50	11:23.....	36
8:17.....	48	11:26.....	36
8:23.....	46	12:11.....	50
8:29.....	44	12:13.....	49
8:29-30	44	12:27-31	50
8:30.....	46,50	13:1-2	50
8:32.....	47	15:22.....	6
8:33.....	44	15:35-45	40
8:34.....	48	15:40-54	50
8:38-39	24,28,31,47		
12:2.....	42	2 MGA TAGA-CORINTO	
12:3.....	50	1:22.....	50

3:3.....	48	1:13.....	50
3:6.....	48	1:14.....	48
3:6-11.....	46	1:18.....	39,48
5:8.....	40	1:19.....	48
5:10.....	41	2:1.....	6,11,24
5:14-15	50	2:4.....	47
5:17.....	24,46,49	2:5.....	24
5:18-19	45	2:6.....	48
5:19.....	50	2:7.....	24
5:20.....	45,48	2:8-9	19,24,47
5:21.....	7,22,24,46	2:10.....	18,46
6:1.....	48	2:14-17	45
6:4.....	48	2:14-19	47
6:18.....	46	2:18.....	47
7:13.....	50	2:20.....	47

MGA TAGA-GALACIA

2:20.....	45	3:16-19	50
3:3.....	51	3:20.....	39
3:25.....	46	4:6.....	49
3:26.....	24,29,46,47	4:7.....	48
4:6.....	50	4:22.....	11
5:16.....	23	4:30.....	50
5:16-18	38	5:2.....	47
6:15.....	46	5:8.....	49
		5:18.....	24,25,30,31,38
		5:25-27	49

MGA TAGA-EFESO

1:3.....	39,50
1:3-6	43
1:5.....	44,46
1:6.....	46
1:7.....	45
1:10.....	24
1:11.....	44

MGA TAGA-FILIPOS

1:6.....	48
2:13.....	48
3:3.....	47
3:9.....	24,46
3:20.....	47
4:11b-13.....	43

MGA TAGA-COLOSAS

1:12.....	46
1:13.....	47
1:14.....	45
1:20.....	45
1:25-26	24
1:27.....	49
2:10.....	50
2:11.....	47
2:12.....	45
2:15.....	47
2:24.....	7
3:1.....	45
3:3.....	45
3:4.....	48
3:12.....	44
3:24.....	48

1 MGA TAGA-TESALONICA

1:1.....	49
1:4.....	44
5:4-5	49
5:23.....	50
5:24.....	44

2 MGA TAGA-TESALONICA

2:16.....	48
-----------	----

1 TIMOTEO

2:6.....	50
4:10.....	50
5:23.....	15

2 TIMOTEO

1:9.....	17
2:13.....	47
4:7-8	41

TITUS

1:1.....	44
2:11.....	50
2:12.....	48
3:5.....	19,24,46
3:7.....	46

MGA HEBREOHANON

2:9.....	50
4:12.....	1
4:16.....	36,47
6:17.....	36
6:20.....	36
7:1.....	36
7:3.....	36
7:25.....	48
9:15.....	48
9:24.....	48
10:14.....	46
10:19-20	47
12:6-7	38
13:5 <i>b</i>	48

SANTIAGO

1:12.....	41
2:15-17	16
3:5-6	14

2 PEDRO

1:2..... 44
1:4..... 48
1:4-5 40
1:5..... 48
1:18..... 45
1:23..... 46
2:4..... 44
2:5..... 46,47,49
2:9..... 36,47,49
2:22..... 11
2:24..... 7,37,45
3:18..... 7
5:4..... 41

2 PEDRO

1:3..... 38,46
1:3-4 22
1:8..... 38
2:1..... 50
3:18..... 23,36,39

1 JUAN

1:8..... 26
1:9..... 24,31,35-38
1:10..... 26
2:2..... 45,50
3:2..... 46
3:17..... 16
3:24..... 50
4:10..... 45
4:13-15 23
5:11-12..... 49

PINADAYAG

1:6..... 47
2:10..... 41
2:28..... 41
19:6-8 49
20:12..... 17
21:2..... 40
21:4..... 40
21:9..... 49
21:16-27 40
22:16..... 41

**SUKARANAN NGA MGA LIBRO NI R. B. THIEME, JR.
GIREKOMENDAR NGA PAGKANHAN-AY**

The Plan of God
The Trinity
Slave Market of Sin
The Barrier
Rebound & Keep Moving
Isolation of Sin
The Faith-Rest Life
God the Holy Spirit vs. The Sin Nature
Mental Attitude Dynamics
Heathenism
Divine Guidance
Prayer
Witnessing
The Prodigal Son

DOKTRINADONG PAGTOON SA BIBLIYA

Doktrina sa Bibliya, ang unod sa pagtudlo nga gikuha gikan sa literal nga interpretasyon sa Kasulatan, maoy sukdanang sa espirituhanong kamatuuran. Ang pagtoon sa Bibliya maghatag og espirituhanong pampabaskog sa mga Kristohanon (Mateo 4:4).

Ang pagkamahinungdanon sa doktrina sa Bibliya pagahatagan gayud og importansiya (Mga Salmo 138:2). Nagmando ang Dios sa mga Kristohanon sa pag-usab sa atong salabutan (Mga Taga-Roma 12:2). Kini nga pagkausab nanginahanglan ug kada adlaw nga pagbag-o sa panghunahuna pinaagi sa pagkat-on ug paggamit sa Pulong sa Dios (2 Mga Taga-Corinto 4:16; Mga Taga-Efeso 4:23).

Sa daghan nang katuigan ang doktrina sa Bibliya nga gitudlo ni R.B. Thieme, Jr., naghatag kada adlaw ug espirituhanong pagkaon sa iyang kongregasyon. Mga libro, DVDs, ug MP3 CDs sa iyang mga gitudlo kini abilabol nga walay bayad o obligasyon. Ang Katalogo sa Pagkat-on sa Doktrina sa Bibliya kini ipanghatag basi sa inyong hangyo.

R.B. THIEME, JR., BIBLE MINISTRIES


P.O. Box 460829

HOUSTON, TEXAS 77056-8829

www.rbthieme.org

Si ROBERT B. THIEME, JR. (1918-2009), nagpabiling makahuluganong tingog sa Kristiyanismo sa tibuuk kalibutan. Ang iyang makugihon, mapatin-awong pagtudlo gibase sa orihinal nga lenggwahe sa Kasulatan inubanan sa paglandag sa makasaysayong konteksto sa panahon nga gisulat ang Bibliya. Ang iyang modernong sistema sa bokabularyo, ilustrasyon, og mga kategoriya Biblikal nagpatin-aw sa pagtudlo sa dili masayup nga mga kamatuuran nga Diosnong Pulong. Si Thieme nakarekord og kapin pa sa napulog-usa ka libo ka mga oras nga mga pagtudlo og nakamantala og kapin pa sa usa ka gatos ka mga libro ug nga hapit nakalokup ug tuki sa Bibliya.

Si Thieme nakatapos didto sa University of Arizona (Phi Beta Kappa) ug Dallas Theological Seminary (summa cum laude). Ang iyang pagtungha sa seminaryo nahunong tungod sa pagpangalagad militar sa Ikaduhang Gubat sa Kalibutan diin misaka siya sa ranggo nga lieutenant colonel sa Kwerpo sa Kasundalohan sa Kahanginan sa Estados Unidos. Human natapos sa iyang padayon nga pagtungha niadtong 1950, siya nahimong pastor-magtutudlo sa Simbahan sa Berachah sa Houston, Texas. Ang iyang nilukop ug gipalapdan nga pagtoon sa Griyego, Hebreyo, tiyolohiya, kasaysayan, ug textual criticism naghatag ug pundasyon sa iyang masuknaong pagtoon ug pagtudlo sa Pulong sa Dios. Si Thieme miluwat sa pagkapastor-magtutudlo sa Simbahan sa Berachah human sa singkwentay tres katuig nga matinud-anong pagpangalagad.



Hinulagway ni Robert Becker

Ang Plano Sa Dios

tapos sa kaluwasan, ug ang mga bahandi nga iyang giandam alang sa imong wala nay kinutobang kaugmaon didto sa langit. Sa takna nga ikaw motoo diha kang Kristo ikaw dihadiha makaambit sa Iyang kinabuhi ug kapalaran. Apan alang sa imong pagkab-ot sa kahibulongang kalinaw, kalipay, ug katagbawan nga giplano sa Dios alang sa imong pagkinabuhi dinhi sa kalibutan, kinahanglan nga ikaw magatuon sa mga doktrina sa Bibliya ug magatubo ngadto sa espirituhanong pagkahamtong. Ang Bibliya nagatudlo sa mga Pulong sa Dios nganha kanimo aron nga ang lintunganay nga kamatuuran mahimong sukdanan sa imong tanlag, tinugdan sa imong mga hunahuna ug pagdasig sa imong pagkinabuhi.

Ginamhan sa Balaang Espiritu ug pagsangkap gikan sa mga doktrina sa Bibliya ikaw makahimo sa pagtuman sa imong kapalaran alang sa paghimaya sa Dios. Ikaw makadawat sa labing taas ug labing maayo nga iyang gihatag alang kanimo. Ang imong makanunayong espirituhanong pagtubo gikan sa mga doktrina sa Bibliya nga anaa na diha sa sulud sa imong kalag magahimo sa imong katakus alang sa pagkinabuhi, alang sa paghigugma, alang sa Kristohanong pag-alagad, alang sa panalangin, alang sa kalipay.

Ang Dios nagahimo ug laraw alang sa mga katuigan, ang hingpit nga plano alang kanimo mismo. Ang imo lamang pagabuhaton mao ang pagsabut sa iyang gihatag ug dihadihang pag-angkon niini alang sa wala nay ikatandi nga kahigayonan sa pagkinabuhing makahuluganon, adunay katuyoan, ug adunay tumong.

nagapadayag sa pagsangkap sa Dios alang sa imong kaluwasan, iyang katuyoan alang sa imong pagkinabuhi